

Nlir nnap-nlà aBulus ônəm Inan oga ARom

Nre-anung

¹ Awasika va ta fa ka atak aBulus uzwal aYesu kəristi. Uzwal uwórwór va ma van fa ka ashe onəm kakul inok nla nnap-nlà Inan ngga nchang nfe.

² Nnap nlà ngga nchang nfe va Inan mor sar nnənap chit matmat ka atak iyam va onəm oga *nkam nre katətak ka là chit nzəng ka nlilir ka ashe nnap-nləla nnənan a.

³ Nnap nlà va ta ka apal ishi aYiyen uPonzhi yi uYesu Kəristi va mí là nnap amar ka ashe izər te, uza fa kakum-jili aDawuda.

⁴ Mi i là nnap aRuhu jiwo te, ma nyám chit ka ashe ichumchum pa uza uYa Inan. Ma nyám ka mban ka atak ngwon ka na ka atak ikú.

⁵ Ka atak a wà kang mmayi ka nfe nchang nnap nnənan Inan ká inok nre aKəristi, na kakul adidin te, nkpaktak akum ijili iga apambin oza a na nnandər ká Inan, oza a nkpak nnap nnəm.

⁶ Nna o ya ka ashe onəm owórwór aYesu kəristi kpa.

⁷ Ma lir awasika va ta na a ga atak nkpaktak onəm Inan omanman owórwór oga aRom.

Re nrwa igwak, ka nra-igwak aPoyi-Inan, ku uPonzhi yi uYesu Kəristi a təm nzəng ká wo.

UBulus dom nnap ngga aRom

⁸ Ngəshi te, mmami ka nna adəngchi íNan mi kakul wo pa kpaktak ka ashe adin aYesu kəristi. Kakul ma fe nnap nna nnandər wo chit gang atak pa lat ka ashe apambin.

⁹ Inan va mmami ka nnəm inunok iga nla nnap aYiyen ngga nchang nfe ká igwak pa izən te, uza i yar anung mi yar pa pa dəkər te, mi pat ka nrəng wo ka ashe aduwa mi kaṭ.

¹⁰ Mmami ka nchal pa Inan ka məman te, ndom nnap ngga atak wo va m pak inok nduḏom chit te, nyangmata te, ka ri.

¹¹ Kakul adom nya wo nəm mi byet, na n kap nzəng ká wo imwa ro iga aruhu va i nak wo o kam.

¹² Nna pa mmami ká wo i kam owan yi ka atak nna nnandər owan yi.

¹³ Ógənanɡ, n dom wo pa o nyi pa nvan chit pa nkyak m pak inok ndamshi izər iga mba atak wo. Ka nna kpa te, na ma man á mi chit kaṭ. N dom nya wo na n ya ka ashe wo kpa mmal apir iyam va Inan ka nnənəm awo inənan wa nva n ya ka ashe onəm va oYahudi kaṭ a.

¹⁴ Mmami ká idək inok ka apal ishi mi kakul nkpaktak onəm, oHeleni ka onəm va oHeleni kaṭ, oga nnyi, ka onəm va ya ka nnyi kaṭ pa kpaktak.

¹⁵ Nna nak te, ngga atak wo lom mi byet, na n là nnap-nlà Inan ngga nchang nfe awo kpa. Mmawo va ka aRom a.

Ichumchum nnap-nlà Inan ngga nchang nfe

¹⁶ Nnap nlà Inan ngga nchang nfe iyam va pa í nəm iwuswawuswa kaṭ. Kakul nnà ichumchum Inan iga nkamshi irirì ánəm va pa kpaktak nna

nnandər ka. Nnap nlà ngga nchang nfe va ta mmá là óYahudi oma nggəshi. A le te mmá là ónəm va oYahudi kaṭ.

¹⁷ Kaṭul nnap-nlā ngga nchang nfe va ta nyám asal aga ntong onənan ka mpyal Inan chit. Asal va ta aga nna nnandər. A ban ka mbəban a ga chu nkukur te, nna nnandər na chwat wa nva ma lir chit ka ashe nnap-nlā Inan pa, <<Unəm va unənan ka mpyal Inan ka atak nna nnandər te, uza i lár.>>

Onəm pa kpaktak pat nnap íNan chit

¹⁸ Mmən-ikum Inan ka nvan kapabur ka apal ishi nkpaktak nnap nnəm onəm ngga nyang ka ngwa Inan ká ina onəm oga nkar nnandər ka atak nnəm ina oza.

¹⁹ Kaṭul iyam va maṭ kà nnyi ka apal ishi Inan kaṭ te, a nyám óza chit ka mban kaṭul Inan nyám óza chit.

²⁰ A ban ka nfa ka apambin te, nnap nnəm Inan va mí ya ká iwu kaṭ te, a sat nggafak ka atak oza kaṭ. Nnap-nnəm Inan va ichumchum chumchum iga n-yà ka nkur kaṭ a. Nna kpa nnap va kà nnyam pa uza Inan a. Ichumchum ká nnap va ta ma ka n-yiia pa kpátkpát. Kaṭul mí kpán ipipir kpán ka atak iyam va Inan nəm a. Kaṭul nva ta te, unəm yà ká iyam ro pa o là kaṭ.

²¹ Kap ka nva pa oza nyinyi pa Inan yiyà te, oza ka nna ichumchum á na wa Inan kaṭ. Oza i na adəngchi á na kaṭ kpa. Nrən-nnap oza mmwan pa kpaktak. Igwák oza ipərək pərək fo chit kpa.

²² Oza i là pa mmawó onəm oga aghan. Oza mpərək te, oza nyi kaṭ.

²³ Ichumchum va mà pà oza a na íNan va i ku kaṭ te, oza na á na kaṭ. Ichér va ma nəm fa izər ku unəm va i kuku, ká inyil, ká izhé iga anyin, ká iyam iga nkpán ka afu te, oma oza ka nna ichumchum óza.

²⁴ Nna nak te, Inan le ka oza chit re ka nnəm iyam-lakchi va dom oza ka nnəm. Oza ka nnəm iyam iga iwuswa ówan oza va byen ndër kaṭ.

²⁵ Oza dom akwam nna ji nnandər Inan. Oza ka ngwop iyam va Inan a nəm. Iyam va ta oza ka nnəm izwal óza kpa. Inan va uwa nəm iyam va ta te, uwa oza yan ngwop ga nkachi. Uza va adəngchi təm ajini chit mbyet mbyet a. Nna a təm.

²⁶ Kakul nva ta te, Inan le ka oza chit re ka nnəm iyam-lakchi iga nnəm-jan va dom oza ka nnəm. Ochar oza le ka nnap nnəm ichar swan ka cho a tan təm ka ashe apir nnap nnəm nggafak.

²⁷ Wanta na kpa onunggwan oza le ka nnap nnəm va mà pà a yà ká ishimshe anunggwan ku uchar te, oza swan ka cho. Ndom nnəm ilakchi ka onunggwan owan oza ka nnak ishi i won oza. Onunggwan ka nnəm iyam iga iwuswa ónunggwan owan oza. Oza ka nsam aya nnəm ilakchi oza va ta ka atak iyam va ka nya oza a.

²⁸ Kakul pà oza yan ka mman pà oza nyi Inan nyi te, Inan le ka oza chit re ka nnəm iyam-lakchi. Pà oza a nnəm iyam iga iwuswa.

²⁹ Oza ka nnəm ina pà gənggəng, ka ndul-afu, ka adom, ka nfar iyam-ina ówan onəm. Oza onəm oga ikpar, ka oga ndom ngban onəm, ka ndom ikum, ka ntan atak, ka mban kafu nnandər mban. Inok oza nnáp onəm,

³⁰ ka nvyap adin onəm, ka nyang Inan, ka nya amwap onəm, ka nrup ká ishi, ka nyar-bal, ka mmār iyām-ina, ka nnyam nlan nnap nnəm ópo oza ka onan oza.

³¹ Igwak tul óza ka nnap kaṭ. Nnandər oza yəl awo kaṭ. Oza yà ka mmaṇ kaṭ. Oza yà ka nrwa igwak kaṭ.

³² Oza nyi iyām va nyi Inan pak chit təm pa unəm va pa kpaktak ka nnəm apir iyām va ta te, a mà pa uza a kuku a. ká nnà te, oza ka nnəm nna pa jak. Oza ka ngga mpyal ka nnənəm na chwat kaṭ. Oza maṇ ka nnəm apir iyām va ta maṇ kpa.

2

Inan gəl akwali wò pa dakdak

¹ Kakul nva ta te, ánəm, u yà ká iyām ro va bu bol anung bu là kaṭ. Mmaḅu va kpaktak ka nla úwan bu pa uza ká mpat a. Ilum va kpaktak bu là úwan bu pa uza pat te, ya mmaḅu ka nla íshi bu pa mmaḅu ká mpat na kpa. Kakul iyām va kpaktak bu là úwan bu pa uza pat te, iyām-zəntən va ta mmaḅu ka nnənəm.

² I nyinyi pa akwali va Inan gəl ka apal ishi onəm oga nnəm apir iyām va ta te, a mà dakdak.

³ Ánəm, a yà pa mmaḅu ka nla úwan bu pa uza ká mpat kan iyām-zəntən va ta kpa mmaḅu ka nnənəm te, u rən pa akwali Inan i re bu re jibu dò?

⁴ U yar nnyi-nnap Inan mmakmak, ka mməmar ka yi pa fəm, ka nkar-igugwak pa amwan dakbo? U nyi pa Inan ka nnyam nnyi-nnap abu na a

dapchi nnap nnəm bu a ga atak wò na u gaban u re nnəm nnap-mbángbang kat dò?

⁵ Te kakul nkak ishi bu, ka nva pa igwak bu dom nre nnəm nnap-mbángbang kat te, mmabu ka nram mmən-ikum Inan pa a vang ka apal ishi bu ká ilum va mí gəl akwali Inan amàmà ka a.

⁶ <<Inan uwa í mwa nza unəm nggo i mà dakdak ká iyam va unəm ka nəm a.>>

⁷ Onəm va ka nram ichumchum va Inan i na, ká inəm va Inan i nak, ka apir ntəm va ikú yà kat, kan oza i ram ka atak nnəm iyam inənan ka nzhin te, Inan i mwa oza ká iriri iga mbyet mbyet.

⁸ Onəm oga ndom ishi, ka oga nyang nnandər, ka oga ntəm ka ashe nlan nnandər te, Inan i mwa oza ka mmən-ikum wò, ka nnyam nfél-igwak.

⁹ Nkpaktak onəm oga nnəm ina te, mbək anung, ká izər-nrwa nnà kakul oza. I yà kakul oYahudi oma mpyal kan onəm va oYahudi kat.

¹⁰ Nkpaktak onəm oga nnəm iyam inənan te, ichumchum va Inan i na, ká inəm va Inan i nak, ka nra-igwak te, nnà i yà kakul oza. I yà kakul oYahudi oma mpyal kan onəm va oYahudi kat.

¹¹ Kakul Inan i nyám nvan nro kat.

¹² Nkpaktak onəm va nəm nnap-mbángbang oza nyi iyam ro ka apal ishi nnap-mpakpak aMusa kat te, mí zhì oza te, mí nap akwali mí wór adin nnap-mpakpak aMusa ro óza ka kat. Nkpaktak onəm va nəm nnap-mbángbang kap ka nva pa ma na nnap-mpakpak aMusa na. Oza te, mí gəl akwali óza ka nnap-mpakpak va ta.

¹³ Kakul nfe nnap-mpakpak ka achwang na chwat i nak Inan i yar unəm ka mpyal wò pa

unənan̄ kaṭ. Onəm va ka nkpak nnap-mpakpak te, oma chwat uza i yar oza ka mpyal wò pa onənan̄.

¹⁴ A yà pa onəm va oYahudi kaṭ kan oza ka nnəm iyam̄ va nnap-mpakpak aMusa là pa ma nəm kaḱul pa oza ya biḱyen pa ma nəm pa kap ka nva pa nnap-mpakpak aMusa pa te, a yar oza kaṭ te, ya oma yà ka nnap-mpakpak na kpa.

¹⁵ Iyam̄ va oza ka nnənəm te, ka nnyam pa iyam̄ va nnap-mpakpak là pa ma nəm te, nná lir tēm ka ashe igwák oza. Ìdimḱim̄ igwak oza ka nla nnap nzəngtən va ta óza kpa pa oza nyi nnap-mpakpak nyi. Nrən-nnap oza nnyi te, ka nnyam ifan óza pa ḱəkər ḱəkər pa oza nyi nnap-mpakpak nyi. I yà pa kaṭ te, ya nrən-nnap oza ka nkam̄ anung oza.

¹⁶ Kalum va ta te, Inan i gəl akwali ónəm pa kpaktak ka apal ishi nrən-nnap ngga igwák oza. Uza i gəl ka atak inok aYesu kərísti wa nva nnap-nlà Inan ngga nchang nfe va mmami ka nləla ka nyinyam a.

OYahudi ka nnap-mpakpak

¹⁷ A yà pa unəm là pa mmawò uYahudi, o ḱar nkam̄ wò ka nnap-mpakpak aMusa nzəng ka nnok kaḱul apir ntəm va ká ishimshe wò ká Inan,

¹⁸ uza nyi iyam̄ va nyi Inan ḱom, ma ḱyang iyam̄ va ḱyang á na nnap-mpakpak aMusa là, uza nyi nvan̄ ishimshe iyam̄ va byen̄ ji pa kpaktak nyi, ká iyam̄ va byen̄ kaṭ,

¹⁹ har uza nyinyi nnandər pa mmawò unəm uga ndap nkpá nggang ónəm-fofo, mmawò atak atántàn ónəm va ka ashe afap,

20 mmawò unəm uga ndyang iyam ónəm va aghan yen oza_yen, unəm uga ndyang iyam ónəm va ovanbak kà nnap awop kakul pa mmawò ká nnap-mpakpak, mmawò kà nnyi va nnyi, pa mmawò kà nnandər kpa va nnandər te,

21 ánəm uga ndyang iyam óro, bu dyang íshi bu ji bu kat dō? Ánəm uga nla pa kan ma nəm ayi kat, bu nəm ayi jibu kat dō?

22 Ánəm uga nla pa kan ma ra ochar onəm kat, bu ra uchar anəm jibu kat dō? Ánəm uga njan ichər, bu nəm ayi kà ashe nzhi ichər kat dō?

23 Ánəm uga nnok kà nnap-mpakpak aMusa, nva bu gantal iyam va nnap-mpakpak aMusa là te, mma bu kà nna iwuswa íNan kat dō?

24 Nnap va ta mà dakdak ká iyam va ma lir kà ashe nnap-nlà Inan pa, <<Onəm va oYahudi kat te, oza kà nvyap adin Inan kakul wo na.>>

25 Mpà ache i yà kà nkamshi yà kà atak anəm, a yà pa uza kà nkpak iyam va nnap-mpakpak aMusa là a. A ya nnyi pa uza kà nggantal nnap-mpakpak va ta te, ya mpà achəche nnap nlakchi.

26 A yà pa unəm uga ache *amulur kà nkpak iyam va nnap-mpakpak aMusa là te, ya mí kun íshi ká imulur va ta pa mpà ache kat dō?

27 Unəm va kà akum oza mí pa ache kat, kan uza kà nkpak nnap-mpakpak va ta pa dakdak te, nnap-nnənəm nak akwali ri bu chit kat dō? Nna a yà pa mma bu va ká nnap-mpakpak aMusa nlirlir kan akum wo i pa ache pa kan mma bu kà nggantal iyam va nnap-mpakpak va ta là a.

28 Kakul unəm va uYahudi unandər te, uza unəm va mí yà uYahudi kà atak awa izər na pa

mwan kaṭ. Mpà ache ngga nnandər te, mpà ache va ka agbai kaṭwa izər kaṭ.

²⁹ Unəm va uYahudi ka ashe igwak te, uwa uYahudi unandər. Mpà ache aga nnandər te, nnap va ka ashe igwak. Nnap va ngga aruhu a. Nnap va ta mpakpak nlirlir kaṭ. Apir anəm va ta Inan i dɛngchi na. Unəm uwa i dɛngchi na kaṭ.

3

Nnandər Inan yél awo yél

¹ Unəm va uYahudi te, uza ji ká iza yà? Kaṭ te, mpà ache ka nza nkamshi yà?

² Nna yà ka nkamshi ka ka nza asal-awu nggo. Ngəshi te, oYahudi oma ma man ka oza, ma nak idək nla nnap-nlā Inan ka ashe awo oza.

³ A yà pa oro ka ashe oza nəm avyal ka nnap va ta, nnandər oza yél awo kaṭ te, a nyan chit san da? Nlan nnandər oza va ta i dan n-yél nsar nnap-nlā Inan dò?

⁴ Ko pa dap iyam ro yà pa kaṭ. Re ma nyi pa Inan pa te, uza unəm uga nnandər kap ka nva pa nza unəm nggo te, unəm uga akwam wa nva ma lir ka ashe nnap-nlā Inan a. Nna pa,
<<Na u bol anung wa là
nnap te, a nyám pa
mmabu ka nnandər.
Ma nap akwali abu te, wa ri.>>

⁵ A yà pa nnap nnəm yi nna nnà ka nnak Inan i mman ka yi pa mmayi onənan ka mpyal wò i fa pa jakjai te, iza i là yà? A yà pa Inan nyám ntan ayi te, pa uza nəm iyam-ibángbang dò? (Mmami ka nnyam ipir nnàp wa apir nja anəm.)

⁶ Ko pa dap iyam ro ya pa kat. Kakul ka ya pa te, i yar sang kang Inan i nap akwali apambin ya?

⁷ <<A ya pa kakul akwam mi kan nnander Inan ka nnyam ka mban i ji mmatmat har a nak te ma ka nna ichumchum a na ji mmatmat te, iza nak kan nna ma ka nnap-akwali a mi na pa har kakul pa mmami unem uga nnap-mbanganbang ya?>>

⁸ Pa na te, iza i dan pa i pa ishi ka nnem iyam ibanganbang na a sat ipir mba ka iyam nennan ayi ya? wantana oro ka nvyap yi i la pa iyam va ta mmayi ka nlala. Akwali va mi gel apir onem va ta aga nri oza te, i mal dakdak.

Unem-nenan ya kat

⁹ Te san da? Mmayi oYahudi i ji abo onem ji do? Ko pa dap. Kakul ka i la chit matmat pa nkpektak onem, oYahudi ka onem va oYahudi kat te, i nak mpat oza chit pa nnap-mbanganbang nna ka nnem ka oza

¹⁰ wa nva ma lir ka ashe nnap-nla Inan pa, <<Unem ro ya unenan kat.

A ya ka pa uzang kat.

¹¹ Unem ro ya uga nkpan ipir nnap kat.

Unem ro ya uga nram Inan kat.

¹² Oza gaban chit pa kpaktak nyan onem-lakchi.

Unem ro ya ka nnem iyam-inenan kat.

A ya ka pa uzang kat.>>

¹³ <<Igosal oza wa awap atungtung.

Inok abelam oza te, nlam onem na.>>

<<Akal izwa kasap anung oza.>>

¹⁴ <<Atam oza yel ka mpwat mpwat, ka nnap-nla ndfulful.>>

¹⁵ <<Oza ghan ashar ka ngga ngbal unem byet.

16 Atak va kpaktak oza i wòl ka te, nlak-atak nzəng ka nlak-igwak i wa nvañ oza.

17 Iyam va mí wór pa mba ka ntəm-ikankan te, oza nyi kaṭ pa kpau.>>

18 <<Nra ayər Inan yà ka ashe ntəm oza ka pa ḍapfɪnyan kaṭ.>>

19 I nyinyi pa iyam va pa kpaktak nnap-mpakpak là te, kakul onəm va ka akum ichumchum ná kan unəm ro a yà ka anung aga nla iyam ro kaṭ. Ná apambin pa kpaktak a nyi kpa pa akwali Inan nna yà kakul oza.

20 Unəm ro yà va Inan i là pa uza unənañ ka mpyal wò kakul pa uza kpak nnap-mpakpak byen pari kaṭ. Kakul ka atak iyam va nnap-mpakpak kà nla te, i nyi pa mmayi ka nnəm nnap-mbángbàng.

Nnap-nnəm nnənañ i ba ka atak nna nnandər

21 N-yanmata jiwo te, ma nyám asal aga ntong onənañ ka mpyal Inan chit va yar nnap nkpak nnap-mpakpak kaṭ a. Atakarda nnap-mpakpak Inan ka aga nnap-nlà onəm oga *nkam nre kaṭətak oza nyám nnap chit ka apal ishishi.

22 Ntong onənañ ka mpyal Inan va ka atak nna nnandər ku uYesu Kəristi te, kakul nkpektak onəm oga nna nnandər, nvañ ro yà ka kaṭ.

23 Kákul nkpektak onəm nəm nnap-mbángbàng chit. Onəm pa kpaktak ka uro ya chu nya ichumchum Inan kaṭ kpa.

24 Ma tong onənañ chit ka mpyal Inan ka atak nkam ishi yi va uYesu Kəristi kam, kakul nnap-nənañ Inan mmakmak.

25 Inan yichi uYesu Kəristi sat iyam iga mpà kakul mmwa akat aga nyar nnap-mbángbáng. N-yar nnap-mbángbáng va ta pa te, mí ya ka atak nna nnandər ká ikuku. Inan nəm pa na o nyám nnəm nnap wò va yà ka á na kat a. Kakul matmat te, kakul nkar-igwak na te, uza yar iwu dər nnap-mbángbáng va ma nəm kat.

26 Inan nəm pa na a nyám ónəm oga ashe nra va ta nnəm-nnap wò va yà ka á na kat a. Na a nyám ka mban pa uza wat te, i nəm iyam kasəsal. Pa uwa i là únəm uga nna nnandər ku uYesu pa uza unənan ka mpyal Inan.

27 Te nnok yi yar ka san nnyi da? Ko pa dap ma gəl chit ma re ka cho. Ma gəl ma re ka cho ka nza asal ya? Ma gəl ma re ka cho kakul mbyen inok yi dō? O'o, ma gəl ma re ka cho ka atak nnap nna nnandər na ka nkukwa.

28 Kakul mmayi ka anung nla pa har pa ka atak nna nnandər na chwat kan Inan i là únəm pa uza tal unənan chit ka mpyal wò. A yar nnap nkpak iyam va nnap-mpakpak ka nləla kat.

29 Inan pa te, uza Inan oYahudi na chwat dō? Onəm va oYahudi kat te, uza Inan oza jo oza kat dō? Akwam kat, onəm va oYahudi kat te, uza Inan oza na kpa.

30 Kakul Inan pa izən. Uza i là ónəm oga mpà ache pa oza tong onənan chit ka mpyal wò ka atak nna nnandər va oza na a. Uza i là ónəm oga ache amulur pa oza tong onənan chit ka mpyal wò ka atak nna nnandər na kpa.

31 A nyan chit pa í nak nnap-mpakpak sat nnap iwali ka atak nna nnandər va chit dō? Ko pa

ɖap iyam ro yà pa kaɓ. Mmayi ka nkam nnap-mpakpak.

4

Nɖyang-nnap ka nnap nnəm aIbərahim

¹ Iza i là ka apal ishi aIbərahim ukəka yi utəmbərən yà?

² Kaɓul ka ya pa uAbərahim tal unəm-nənən ka mpyal Inan ka atak mbyen inunok na te, ya uwa ká iyam va uza i nok ka. Nnunok va ta i yà ka mpyal Inan jiwo kaɓ.

³ Iza va nnap-nlà Inan ka là yà? Nnap nlà Inan là pa, <<UAbərahim na nnandər ká Inan te, ma kun ishi á na ka pa nna nnap nnəm nnənən ka mpyal Inan.>>

⁴ Unəm uga nnəm inok va mí mwa na mwa kaɓul te, mí wór amumwa pa imwa kaɓ. Iyam va ta mal pa uza a ya.

⁵ Unəm va nnyi ka nnəm inok va kaɓul amwa kaɓ, uza na nnandər na chwət ká Inan va i là únəm uga nnap-mbángbáng pa uza tal unənən chit ka mpyal wò te, mí kun ishi á na ka nna nnandər nandər va ta pa nnap nnəm nnənən ka mpyal Inan.

⁶ UDauda ka là nnap nzəngtən va ta nva uza ka là nnáp apir nnap nnənən va ka apal ishi anəm va Inan i kun ishi ka na pa uza ka nnap nnəm nnənən ka mpyal wò kaɓul mbyen iyam ro va unəm va ta nəm kaɓ a.

⁷ Uza là pa,
<<Nnap-nnənən nna yà
kaɓul onəm va ma yar

mpat oza_ óza_ chit.

Onəm va ma dərəkən nnap-mbángbàng oza_ le óza_ chit kpa a.

⁸ Nnap-nnənan tēm chit kakul anəm va

ka_ pa_ ɖap uPonzhi-Inan

i kun ishi á na ka_ nnap-mbángbàng bángbàng kat_ a.>>

⁹ Nnap-nnənan va ta kakul onəm oga mpà ache ka_ nkukwa dò? Kat_ te, a yar onəm oga ache amulur yar kpa? Iyam va_ i pak inok nləla chit te, pa, <<Ma kun ishi úlberahim ka_ nna nnandər nandər pa_ nnap nnəm nnənan ka_ mpyal Inan.>>

¹⁰ A yar sang kang ma kun ishi á na ka_ yà? Ya kan ma pà ache á na dò? Kat_ te, ka_ nvan va uza_ pà ache chit? Ko pa_ ɖap ka_ nvəvàng kat_. Ya kan uza_ i pà ache.

¹¹ Mpà ache va_ ma pà á na te, iyam iga nre adal aga nnyam nnap na pa mwan. Iyam va iga mbam nnap pa_ uza_ tal unənan chit ka_ mpyal Inan kakul nna nnandər va uza_ na ká Inan ya uwa pà ache chit kat_ a. A yà pá na uza_ a tal upo nkpaktak onəm oga nna nnandər, na ma kun ishi ka_ oza_ kpa pa_ onənan ka_ mpyal Inan va nkpak pa_ ma pà ache óza_ kan kat_.

¹² wantana kpa uza_ a tal upo onəm oga mpà ache va mpà ache na chwat oza_ ka_ kat_. Oza_ ka_ nyar nvan aPo yi uAbərahim ka_ ashe nna nnandər va_ uza_ na, ya na ma pà ache á na chit kat_ a.

Mi i tong onənan ka_ atak nna nnandər

¹³ Nsar nnap-nlā va_ ma sar úlberahim ka_ akum ijili jili pa_ uza_ i wur akup ka_ apambin te, kakul pa_ uza_ kpak nnap-mpakpak nro kat_. Kakul pa_

uza na nnandər na te, Inan yar na pa uza unəm-nənan ka mpyal wò.

¹⁴ Ka kul a ya pa onəm va ka nkpak nnap-mpakpak oma i wur akup te, ya nna nnandər sat nnap nlakchi chit kan nsar nnap-nlà Inan va ta sat inəngnəng chit kpa.

¹⁵ Ka kul nnap-mpakpak i dap mmən-ikum Inan i ba únəm. Atak va nnap-mpakpak ya ka kat te, mpat-nnap i ya kat na kpa.

¹⁶ Ka kul nna te, nnap va ta a yar nna nnandər na chwat, na a ya ka kul nnap nnənan Inan. Na a nyám rípkaktak akum ijili albərahim pa nsar nnap-nlà va ta nnandər. A nyám ónəm oga nkpak nnap-mpakpak na chwat ka ashe oza kat. A nyám ónəm oga nna nnandər apir nja albərahim kpa. Uwa upo yi pa kpaktak

¹⁷ wa nva ma lir ka ashe nnap-nlà Inan pa, <<N nak bu chit u tal upo akum pa kyák.>> Uwa Inan yar na pa upo yi. Inan va uza na nnandər ka na. Inan va i na iriri ónəm okúkú. Uwa kpa i wór iyam va ka ya chit kat bu là pa nna ya a.

¹⁸ UAbərahim ka gbák nva pa uza a nak igwak pa o ya uyen lap kat. Ka nna kpa te, uza nak igwak ká Inan ka atak nna nnandər pa o ga ntal upo akum pa kyak wa nva ma là á na pa, <<Akum ijili bu i ya pa kyak.>>

¹⁹ Nna-nnandər nandər vang ká izər kat. Uza məman pa izər wò dɔngdɔng ká ikuku kat, ka kul pa uza dat chit ká izun igbal. Nva pa uchəchar uSaratu watar chit nva pa uza a mar te, a dak na kat.

²⁰ N-yen ka ashe nna nnandər ro ya ka ashishe nva pa a nak na a là pa nsar nnap-nlà Inan va ta

akwam kaṭ. Kaḍor nva ta te, nna nnandər nandər a kam məmat. Uza na ichumchum íNan.

²¹ Uza nyinyi ka ashe igwak wò pa Inan uwa ya ká ichumchum iga nnəm iyam va uza nsar nnap-nləla.

²² Nna nak te, <<Ma kun ishi á na ka nna nnandər nandər va ta pa nnap nnəm nnənan ka mpyal Inan.>>

²³ Nnap nlə va pa, <<Ma kung ishi á na ka.>> Te, ma lir kakul a wà ka nkukwa kaṭ.

²⁴ Ma lir kakul yi kpa. Mmayi va i na nnandər na ká Inan va wong ka uPonzhi yi uYesu ka atak ikú a.

²⁵ Uwa ma re ma gbaḷ na kakul nnap-mbángbang yi. Ma won ka na ka atak ikú na ma là pa i tong onənan chit ka mpyal Inan.

5

Nra-igwak ka atak Inan

¹ A ya chit pa ma nak yi chit i tong onənan ka mpyal Inan ka atak nna nnandər te, ya ntəm-ikankan ya chit ká ishimshe yi ká Inan kakul aPonzhi-Yesu Kəristi.

² Ka atətak na i ya asal aga ntar ka ashe nnap nnənan va mmayi ka ashishe nyangmata kakul nna nnandər yi a. Mmayi ka nlan ka nnak-igwak yi kpa pa i ya atak nsat nchumchum Inan ya.

³ Nna ta chwat kaṭ. Mmayi ka nlan ka mbək anung yi kpa. Kakul i nyinyi pa mbək anung i ba ka nkar-igwak.

⁴ Nkar-igwak nnyi te, i nak unəm i ya ka nnap nnəm. Nnap-nnəm i ba ka nnak-igwak ká iyam.

⁵ Nnak-ìgwak yi nnyi te, i na ìwuswa ayi kat. Kaḱul Inan zuk mman wò ayi chit ka ashe ìgwak yi ka atak inok aRuhu-Nənan va uza na yi chit a.

⁶ Nna ká i kam chit kat te, uKəristi ku kulum va mal pa dakdak kaḱul onəm oga nyang ngwa Inan.

⁷ A kam byet nva pa ma ya unəm a man a ku kaḱul anəm uga nnap nnəm nnənan. Mo te, kaḱul anəm-nənan pa chak te, ìgwak i kam na kam uza i man i ku ká pá.

⁸ Ka nna kpa te, Inan nyám mman wò a yi ka asal va ta. Nna ká yà onəm oga nnap mbángbang te, uKəristi kú kaḱul yi.

⁹ N-yanmata a ya chit pa i tong onənan chit ka mpyal Inan ka atak ikuku te, ya ka atak a wà í ya nkamshi pa makmak, mmən ikum Inan i yar yi kat.

¹⁰ Nna ká i yà onəm oga nyang Inan te, ma gwang inal ká ishimshe yi ka na ka atak ikú aYiyen. Ka nvang ngwang inal va ta te, nkamshi va i ya, mmən ikum Inan i yar yi kat, kaḱul pa uza uriri te, ya i mak i jiji pa gənggəng.

¹¹ Nna ta chwat kat. Mmayi ka nlan ká Inan ka atak aPonzhi yi uYesu Kəristi va katətak na kang i ya ngwang inal ká Inan ñyangmata a.

Ikú ba ka atak Adamu iriri i ba ka atak aKəristi

¹² Te wa nva nnap mbángbang tar ashe apambin kaḱul anəm pa uzəng kang ikú ba ka atak nnap mbángbang te, ka asal va ta ikú ya onəm pa kpaktak. Kaḱul ma nəm nnap mbángbang chit pa kpaktak.

¹³ Kan mí pak nnap mpakpak te, nnap mbángbang yà chit ka ashe apambin. ká nnà te,

ka ya pa nnap-mpakpak ya kat te, ma ka i kun ishi ka nnap-mbángbang kat.

¹⁴ Ka nna kpa te, a ban ku uAdamu ba chu nra aMusa te, ikú nəm ichumchum ka apal ishi onəm har ka onəm va gantal iyam va nnap-mpakpak là, wa nja Adamu kat a. Uza va sat wa iyam iga nnyam apir anəm va ka ngwon nvan a.

¹⁵ Imwa Inan jiwo te, wa nggantall nnap va ta kat. Kakul a ya pa onəm pa makmak ku kakul pa unəm pa uzəng a gantal nnap-mpakpak te, nnap nnənan Inan ka imumwa va ba kakul nnap nnəm anəm pa uzəng uYesu Kəristi te, i zuk i mak pa gənggəng kakul onəm pa kyak.

¹⁶ Kadi te, imwa va ta te, ka pa dap iyam va nnap-mbángbang anəm uga uzəng va ta ba ka kat. Kakul akwali va ma gəl ka nvan nnap-mbángbang anəm uga uzəng va ta te, a ba ka nnak akwali ri unəm. Imwa va nnyi ba ka nvan nggantall nnap-mpakpak nvan pa nkyak te, a ba ka nnak mí tong onənan ka mpyal Inan.

¹⁷ Kakul a ya pa ka atak nggantall nnap mpakpak anəm uga uzəng va ta kang ikú ka nnəm ichumchum ka unəm ka atak anəm uga uzəng va ta te, onəm va nnyi kam nnap nnənan Inan va mak pa gənggəng ka imwa va ntong onənan ka mpyal Inan te, oza i nəm ichumchum i ji nva ta ji pa makmak ka atak ntəm ka iriri anəm uzəngtəng va ta va uYesu Kəristi a.

¹⁸ Te wa nva nggantall nnap-mpakpak anəm uga uzəng va ta a ba ka akwali ikú ónəm pa kpaktak te, wa nna ta kpa nnap nnəm nnənan anəm uzəntən va ta, a tal nkpaktak onəm iyam va

nak ma tong onənan ka mpyal Inan, ma ya iriri a.

¹⁹ Wa nva onəm pa makmak tong oga nnəm nnap-mbángbàng ka atak nlan nkpak nnap nnəm anəm uga uzəng va ta te, wa nnà ta kpa nkpak nnap nnəm anəm uzəntən va ta i nak onəm pa kyak i tong onənan ka mpyal Inan.

²⁰ Ma pak nnap-mpakpak na a jwak nggantal gantal. ká nnà te, atak va nnap-mbángbàng ka mmak ka te, nnap nnənan Inan i mak pa gənggəng.

²¹ Ná wa nva nnap-mbángbàng ka nnəm ichumchum ka apal ishi anəm ka atak ikú te, wa nnà ta kpa nnap nnənan Inan ka nnəm ichumchum ka apal ishi anəm ka atak ntong onənan ka mpyal Inan va i ba ká iriri iga mbyet mbyet ayi ka atak áYesu kəristi uPonzhi yi a.

6

Nnap-mbángbàng ba ká ikú, uYesu te, a ba ká iriri

¹ Te iza i là yà? I ga mpyal ka nnəm nnap-mbángbàng na a ba ka mmak nnap nnənan dò?

² Ko pa dap iyam ro ya pa kat. Mmayi va i gbal ka nnap-mbángbàng chit i re te, í le sang kang í təm ka ashishe na pa har yà?

³ Kat te, o nyi kat dò? Nna pa nkpaktak yi va ma nəm abaptisima ayi chit va gwang yi ku uYesu Kəristi te, abaptisima va ta a nyám chit pa i ku chit kpa nzəng ka na a?

⁴ Kakul nva ta te, ya ma li yi chit kpa nzəng ka na ka atak nnəm abaptisima ka ashe ikuku. Kakul wa nva ma wong ka uKəristi ka atak ikú

kā ashe ichumchum aPoyi Inan te, wa nnà ta kpa mma wong kā yi chit kā atak ikú na i tēm ntēm mpipe.

⁵ A yà chit pā i nyan iyām-zəntən chit kā na kā atak iyām vā ikuku nyám te, ya i yà iyām-zəntən kā na chit kpa kā atak nguwon kā atak ikú.

⁶ Í nyinyi pā ma pak nnap nnəm yi mmatmat chit kā apal akun ikú nzəng kā na, na a nak nnap mbángbāng vā kā ashe yi te, a yà ká ichumchum ro lap kət. Ná kang i tong ozwal nnap mbángbāng lap kət.

⁷ Kākul unəm va pā kpaktak ku chit te, ma jul na chit kā nnap-mbángbāng.

⁸ A yà pā i ku nzəng ku uKərísti chit te, i na nnandər na pā í lár nzəng kā na na kpa.

⁹ I nyinyi pā ma won ku uKərísti chit kā atak ikú. Kākul nvā ta te, uza i ku lap kət. Ikú yà ká ichumchum ro lap kā apal ishishi kət.

¹⁰ Ikú vā uza kā ku te, uza ku ikú nnap-mbángbāng nva pā nzəng na byet kākul onəm pā kpaktak. Nwuwon kā atak ikú nnyi te, uza won na uza a tēm kākul Inan.

¹¹ Wantana kpa re o yar ishi wo pā o kú ikú nnap mbángbāng chit. Te mmawó kā ntēm ká irirì Ínan kā ashe aYēsu Kərísti.

¹² Kākul nvā ta te, kan o mañ o re nnap-mbángbāng a nəm ichumchum ká izər wo va i ku kət. Ichumchum chumchum va i nak wo kā nnəm iyām-lakchi va izər dom a.

¹³ Kan o yichi oga mban-izər wo kàđi a sat iyām-inok ina iga nnəm nnap-mbángbāng kət. Re o yichi ishi wo íNan wa onəm va ma nak oza chit lár

ka nvaṇ ngwon ka atak ikú a. O yichi nza mban-izər wo nggo íNan a sat iyam-inok inənaṇ.

¹⁴ Kaḱul nnap-mbángbāṅg i yà ka nnəm ichumchum ka apal ishi wo kaṭ. Kaḱul mmawó onəm va nnap-mpakpak ka nnəm ichumchum ka apal ishi wo kaṭ. Nnap-nnənaṇ Inan nna ka nnəm ichumchum ká wo.

Ozwal nnap nnəm nnənaṇ Inan

¹⁵ Chit te, san da? I nəm nnap-mbángbāṅg pa shat kaḱul pa nnap-mpakpak nna ka nnəm ka yi kaṭ, pa nnap nnənaṇ Inan nna ka nnəm ka yi dō? Ko pa ɖap iyam ro ya pa kaṭ.

¹⁶ O nyi kaṭ dō? Nna pa a yà pa o pá ishi únəm ro na o kpak nnap nnəm á na wa ozwal te, ya o tong ozuzwal chit na nnaṇ a? O yà ozwal nnap-mbángbāṅg va nkùkùr ikú, kaṭ te o yà ozwal oga nkpak nnap nnəm va nkùkùr ntong onənaṇ ka mpyal Inan a.

¹⁷ Aɖəṅgchi təm aji Inan chit. Kaḱul kap ka nva pa ka o ya ozwal nnap-mbángbāṅg te, nyangmata te, mmawó ka nkpak nnap nnəm ká igwak pa izən âpir ndyang va ma ka ɖyang awo a.

¹⁸ Ma jul wo ká izwal nnap-mbángbāṅg te, o tong ozwal inok inənaṇ.

¹⁹ Mmami ka nna aman nnap-nlà awo kaṣal va unəm i là nnap kaḱul igwák wo tul gbāl kaṭ. Wa nva ka o yichi oga mban-izər wo ká izwal iga nnəm ilakchi ká ina ka apal ishi ina te, nyangmata te, ó yichi oga mban-izər zəṅgtəṅg va ta ka nnəm izwal inok inənaṇ kaḱul nnəm iyam va yà ka adak kaṭ a.

²⁰ Ko o yà ozwal nnap-mbángbàng te, iyam ro ðak wo ká inok inənan kat.

²¹ Chit te, nza apir nkamshi ka o ya ka atak nnəm pa yà? Iyam va nyangmata te, oza tong iyam iga iwuswa chit ka atak wo a? Akwam kat, nkùr apir nnap nnəm va ta ikú.

²² N-yanmata nva ma jul wo chit ká izwal nnap-mbángbàng o tong ozwal Inan te, iyam va o ya iga nkamshi te, i nal wo. Apir nnap nnəm va ta i ba ká iriri iga mbyet mbyet.

²³ Kakul amwa nnəm nnap-mbángbàng te, ikú. Imwa Inan jiwo te, iriri iga mbyet mbyet ka ashe Yesu-Kəristi uPonzhi yi.

7

Nnyam ipir-nnap ká ivan

¹ Ógənanɡ o nyi kat dō? Mmami ka nla nnap ónəm va nyi nnap-mpakpak nyi a. Nna pa nnap-mpakpak pa te, ká ichumchum ka apal ishi anəm a yà pa uwa ya ká iriri a.

² Re i là wa aghan nnyam ipir nnap. Nnap mpakpak ka apal ishi nnap ivan te, a yà pa uchar vang chit te, ivan təm chit ká ishimshe shimshe ku ubəbar har ikú anəm va ta. A yà pa unəm va ta won ku re na te, ya ikú va ta fən na chit ka atak nnap-mpakpak ivan va ta.

³ Nna nak te, a yà pa ubəbar uwa ku chit kat, kan uza vang ku unungwan ukak te, mí wór apir achar va ta pa uchar uga nram onungwan. A yà pa ubəbar ku chit te, ya ma fən na chit ka atak nnap-mpakpak ivan oza. A yà pa uza ga vang

ku unungwan ukak te, mí wór na pa uchar uga nram onungwan jiwo kat.

⁴ wantana kpa ká wo ógənanɡ. O ku ka nnap-mpakpak chit na kpa ka atak nku aKəristi, na unəm ro a nəm ichumchum ká wo. Uza va ma won ka na ka atak ikú a. Na i mar ishi íNan.

⁵ Kakul nva ká i təm apir nja anəm te, adom nnəm ilakchi va nnap-mpakpak i nak i won inok ka ashe yi te, nna nəm inok ka ashe oga mban-izər yi na i mar ishi va iga ikú.

⁶ N-yanmata jiwo te, iyam va ka pa ikan ayi te, katətak te, i ku chit. Ma fən yi chit ka atak nnap-mpakpak na i nəm izwal íNan kasal apipye aja aRuhu. Í nəm izwal íNan lap ka asal amatmat aga iyam lirlir va ma lir pa ma kpak kat.

Mbək anung ka nnap-mbángbàng

⁷ Te iza i là da? Nnap mpakpak iyam ibabən dō? Ko pa dap iyam ro ya pa kat. Kakul ka ya pa nnap-mpakpak ya kat te, ka n nyi iyam va mí wór pa nnap-mbángbàng kat. Ka ya pa nnap-mpakpak là pa kang wa gwáng iyam anəm kat te, ka n nyi iyam va mí wór pa ngwan iyam anəm kat.

⁸ Nnap-mbángbàng ya mbagar chit pa ka atak iyam va nnap-mpakpak là te, a mar apir adom pa dongdong aga ngwan iyam onəm ka ashe mi. Kakul ka ya pa nnap-mpakpak yà kat te, nnap-mbángbàng ka sat iyam-kuku.

⁹ Kà yà n nyi nnap-mpakpak chit kat te, kà n yà uriri. N nyi iyam va nnap-mpakpak là te, nnap-mbángbàng yà nriri. Mmami nnyi te, n kú.

¹⁰ Iyam va nnap-mpakpak là te, n dufom pa ka ba ká iriri á mi. Kà nna kpa te, a dap ikú ba á mi.

11 Kakul pa nnap-mbángbàng yà mbagar ka atak iyam va nnap-mpakpak là te, a tan mi har a nak mi n kú ka atak iyam va nnap-mpakpak va ta là a.

12 Kakul nva ta te, nnap-mpakpak pa te, nnənan adak ro yà ka ashishe kat. Iyam va nnap-mpakpak ka nləla te, inənan adak ro yà ka ashishe kat na kpa. Iyam inənan va dakdak. A byen pari.

13 Chit te, a nyan chit pa iyam va inənan te, nna nyan iyam iga mba ká ikú á mi dò? O'o ka pa dap iyam ro ya pa kat. Nnap-mbángbàng nna ba ká ikú á mi na a nyám ishi wò pa kpátkpát iyam va uza a. Nnap-mbángbàng dapchi ikú ba á mi ka atak iyam va inənan. Ka atak iyam va nnap-mpakpak ka nləla te, nnap-mbángbàng a nyám ishi wò chit pa o bəban na byet.

14 I nyinyi pa nnap-mpakpak pa te, iyam va nnap ngga aruhu. Mmami jem te, mmami ka ashe nnap nnəm nja anəm. Nnəm izwal nnap-mbángbàng na mmami ka ashishe.

15 N kpán ipir iyam va mmami ka nnənəm kat. Kakul iyam va n dom te, nna mmami ka nnənəm kat. Iyam va nnyi n dom kat te, nna mmami ka nnənəm.

16 Te a yà pa mmami ka nnəm iyam va n dom kat te, ya m man chit pa nnap-mpakpak pa te, iyam inənan.

17 Te ya mmami na ka nnəm iyam va ta kat. Nnap-mbángbàng va təm ka ashe mi te, nna i nəm.

18 Kakul n nyinyi pa iyam-inənan ro yà ka ashe mi kat. Mmami ka nla nnap ntəm mi ngga nnap

nnəm ngga izər. Kəkul a ɔm mi ɔm ká ìgwak pa_ń nəm iyam va dakdak. Ka_nna kpa te, n yà ká ichumchum iga nnənəm kat.

¹⁹ Iyam-inənan va n ɔm pa_ń nəm te, nna mi nəm kat. Iyam-ibángbang va ɔm mi ka_nnəm kat te, nna mmami ka_nnənəm.

²⁰ A ya chit pa_mmami ka_nnəm iyam va ɔm mi ka_nnəm kat te, ya mmami na ka_nnənəm kat. Nnap-mbángbang va təm ka_ashe mi te, nna ka_nnənəm.

²¹ A nak te, n nyi pa_nnap va ta_ka_nnəm inok ka_ashe mi. Nna pa_ilum va kpaktak mi ɔm nnəm iyam-inənan te, mi ya ishi mi ka_nnəm iyam-ibángbang a.

²² Ka_ashe idimdim ìgwak mi te, nnap-mpakpak Inan nnà m man ka_.

²³ ká nnà te, n nyinyi pa_nnap-nkak na yà ka_nnəm inok ka_ashe oga mban-izər mi. Nnap va ta_ka_nlun mi ka_atak nrən-nnap va mmami ka_nrərən. Nnap va ta_nak mi n tal_uzwal nnap-mbángbang va ka_nnəm inok ka_oga mban-izər mi.

²⁴ Mmami unəm va n sat ka_nlak-ìgwak. Uda i kamshi mi mi fa ka_ashe inok izər va i ga ka_mi ka_ashe ikú yà?

²⁵ Adəngchi təm aji Inan chit, kəkul uYesu Kəristi uPonzhi yi kamshi mi chit. Mmami ká ishi mi ká nrən-nnap mi te, nnap-mpakpak Inan ngga nnandər nna mmami ka_nnəm izwal á na. Ká izər mi jiwo te, mmami ka_nnəm izwal ínap-mbángbang.

Ntəm ka atak ichumchum aRuhu

¹ Kakul nva ta te, nyangmata te, akwali aga nri onəm ro yà kakul onəm va oja aYesu kəristi kať.

² Kakul ka atak inok aYesu kəristi te, iyam va aRuhu ka nləla pa ma nəm iga mba ká iriri te, a fən mi chit n fa ka ashe iyam va nnap-mbángbang ka nləla pa ma nəm iga mba ká ikú a.

³ Iyam va mat nnap-mpakpak ka nnəm kakul pa nnap nnəm yi nja anəm a kam chu nnənəm kať te, Inan tul nnap-mbángbang chit, nva uza nre nre ku uyen wò ká izər wa ijiyi iga nnap-mbángbang na uza a dərken nnap-mbángbang a le ka cho.

⁴ Na iyam-inənan va nnap-mpakpak Inan là pa ma nəm te, í kpak pa kpaktak ka iro a bur kať. Mmayi va ka ashe ntəm yi te, iyam va nnap nnəm ngga izər ka nla pa ma nəm te, nnà mmayi ka nnənəm kať. Í nəm ija aRuhu.

⁵ Onəm va ka ntəm apir ntəm ngga nnap nnəm ngga izər te, nnap nnəm oza pa kpaktak i ga ká iyam va nnap nnəm va ta dom. Onəm va nnyi ka ntəm apir ntəm ngga aRuhu te, nnap nnəm oza pa kpaktak i ga ká iyam va aRuhu dom.

⁶ Nnak nnap nnəm pa kpaktak i ga ká iyam va nnap nnəm ngga izər te, nkukur ikú. Nnak nnap nnəm pa kpaktak i ga ka nnap aRuhu nnyi te, i ba ká iriri iga mbyet mbyet, ka nra-igwak.

⁷ Kakul nnak nnap nnəm pa kpaktak i ga ká iyam va nnap nnəm ngga izər te, nva ta ngwan inal ká Inan kať. I ya ka npak nnap-mpakpak Inan kať. Nnənəm i məmat.

⁸ Onəm oga ntəm apir ntəm nnap nnəm ngga izər te, Inan i fe nchang oza ka pa dap kať.

⁹ Mmawo jiwo te, o tēm apir ntēm nnap nnēm ngga izēr na kaṭ. Mmawo onēm va ka ntēm apir ntēm nja aRuhu, a yà pà aRuhu Inan ka ntēm ka ashe igwák wo a. Unēm va kpaktak yà ka aRuhu aKēristi kaṭ te, ya uza uja aKēristi kaṭ.

¹⁰ A ya nnyi pà uKēristi uwa yà ka ashe igwák wo te, ya izēr wo ku chit ka nnap-mbángbàng. Ka nna kpa te, aruhu wo jiwo te, ariri kakul o tong onēnan chit ka mpyal Inan.

¹¹ A yà pà aRuhu Inan va won ku uYesu ka atak ikú ka ntēm ka ashe igwák wo te, ya uza va won ku uYesu Kēristi ka atak ikú te, uza i na iriri ízər wo na na kpa. Izər va i tēm mbyet mbyet kaṭ a. Uza i na ka atak aRuhu Ruhu va ka ntēm ka ashe igwák wo a.

¹² Kakul nva ta te, ógənanɡ, o ya chit pà i ya ka akat nnap nnēm ngga izər ro ká ishi yi na i tēm ntətəm kaṭ.

¹³ A yà pà o tēm apir ntēm ngga nnap nnēm ngga izər te, ó ku. A ya nnyi pà o ji nkam iyam va nnap nnēm ngga izər i nēm ka atak ichumchum aRuhu te, ó lár.

¹⁴ Onēm va pà kpaktak aRuhu Inan ka nkpak oza te, oma ovan Inan.

¹⁵ ARuhu va ka o kam te, aga nnak wo ka nnēm izwal ayər kàḍi kaṭ. ARuhu va ta aga nnak mí tong ovan omarmar. A nak te, mmayi ka ngwór awór pà shat pà, <<Ábba, uPon.>>

¹⁶ ARuhu ká ishi wò nzəng ká aruhu yi ka nla a yi pà nnandər mmayi ovan Inan.

¹⁷ A yà pà mmayi ovan te, ya i tong ovan oga ngwur iyam akup chit kpa. Onēm oga ngwur iyam akup Inan va i wur nzəng ká uKēristi a. Nna

a yà pà mmayi kà mbək anung nzəng kà na a. Te í ya atak nsat nchumchum nzəng kà na.

Ichumchum iga nra ngga mba

¹⁸ Kà atak nya mi te, mbək anung vā kà ashe nra vā tā mmayi kà nfe kà te, mí mal kà atak nsat nchumchum vā mí ga nnyinyam kà ashe yi kàt.

¹⁹ Nkpaktak iyām vā Inan nəm te, oza kà nlok kà nzhəng, ilum vā mí nyám ovan Inan kà kà mbang.

²⁰ Nkpaktak iyām vā Inan nəm te, oza kà nswam pà pitpit kakul a yar abəban ôza chit. Nvā ta ndom oza kàt, ndom Inan vā nəm iyām vā ta kà nnak igwak pà

²¹ iyām vā kà ishi wò uza nəm oza te, nna ga mí jul oza kà izwal mwan, na oza a jul apir njul ngga nya atak nsat nchumchum nji ovan Inan.

²² I nyinyi pà nkpaktak iyām vā Inan nəm te, kà ndum kà izər arwa wa ndum kà nrwa amar ba chu nra vā ta.

²³ Nna ta chwat kàt. Mmayi kà ishi yi vā i kam aRuhu-Nənan vā wa awar aga mmor nyal kà ashe iyām vā í ga n-yiyá te, mmayi kà ndum kpa kà ashe igwák yi nvā mmayi kà nlok kà nzhin, ilum vā mí wur yi i tong ovan omarmar a. Iyām vā nkamshi izər yi vā ta a.

²⁴ Ma kamshi yi i ya iriri te, mmayi kà apir nnak-igwak vā ta. Nnak-igwak kan unəm ya iyəyām ya kà iwu te, ya a sat nnap nlakchi chit. Uda i təm kà nnak igwak kà apal ishi iyām vā uza ya chit yà?

²⁵ A ya nnyi pa mmayi ka nnak igwak ka iyam va i ya ka iwu chit kat te, ya í lok nya iyam va ta nzeng ka nkar igwak.

²⁶ wantana kpa aRuhu ka nkamshi yi ka nnem iyam va kpaktak nkam yi chu nnenem kat a. Kakul i nyi iyam va ma pa i chal kat. ARuhu nna ka ishi wo te, uwa ka nchal Inan ayi ka adum va abelam kur nlala kat a.

²⁷ Uza va kur iyam va ka ashe igwak yi te, uza nyi iyam va nyi aRuhu dom nlala. Kakul iyam va Inan dom te, nna aRuhu i chal kakul onem Inan.

Mmayi onem oga igwan va ipapar ya kat

²⁸ I nyinyi pa ka ashe nza iyam nggo te, Inan i nak i ya iga nkamshi ka atak onem va man na man, onem va ma wor oza chit ma dakdak ka iyam va uza dom a.

²⁹ Onem va Inan yak chit matmat te, oma uza nak chit tem pa oza i yar nnap nnem aYen wo. Na uYen va ta a ya ugashi ka ashe ogenan wo pa kyak.

³⁰ Onem va uza nak chit tem pa i ya ojiwo te, oma uza wor. Onem va uza wor te, oma uza la oza chit pa oza onenan ka mpyal wo. Onem va uza la oza chit pa oza onenan ka mpyal wo te, oma uza na atak nsat nchumchum oza chit.

³¹ Te iza i la ka apal ishi nnap va ta ya? A ya pa Inan ka nlap asem yi te, uda kur nlun yi ya?

³² Uza va gor uyen wo kat, uza na na ka ikú kakul yi pa kpaktak te, uza i na nkpaktak aboshi iyam ayi kpa pa makmak kat do? Nna iyam va uza i na mban-fu ro ya ka kat a?

³³ Uda kur nla iyam-ibángbàng ro ka apal ishi onəm-yákyàk Inan yà? Unəm ro kur kaṭ. Kakul Inan wa chwát i là pà oza tong onənan chit ka mpyal wò.

³⁴ Chit te, uda kur nla pà o gəl akwali i ri oza yà? Unəm ro yà kur kaṭ. Kakul uYesu Kəristi va ka ku ma won ka na ka atak ikú kan uwa təm kawo ari Inan te, ka nchal Inan kakul yi.

³⁵ Uda kur nkap yi ka mman aKəristi yà? Nďaktak kukur dò? Mbək anung dò? Nna idumdum ayi dò? Ayang dò? Nlang ìlukwan iga mpá ka izər dò? Iyam iga nri nggom dò? Nlung yi ka ndokchi dò?

³⁶ Wa nva ma lir ka ashe nnap-nlà Inan te, pa na. Nna pa,

<<Kakul nnap bu na ma ka ngbáng yi, alum i ga i tar pà chit na ma ka anunung.

Ma yar yi i tong wa itám va mí ga mpèpà.>>

³⁷ Ka nna kpa te, ka ashe iyam va ta pà kpaktak te, mmayi onəm oga igwan va ji nkam nla ji, ka atak ichumchum anəm va ta uwa ka mman yi a.

³⁸ N nyinyi pà kpátkpát pà iyam ro kur nkap yi ka mman aKəristi kaṭ. Ko ikú, kaṭ te iriri, kaṭ te omaleka obwakan ka ochumchum, kaṭ te nnap ro ngga ashe nra va ta, kaṭ te ngga ashe nra ngga mba, kaṭ te nza apir ichumchum nggo, kaṭ te

³⁹ iyam va ka apal akúrkúr, kaṭ te ka ashe ache agbàngban, kaṭ te aboshi iyam va pà kpaktak ma nənəm te, a kur nkap yi ka mman Inan kaṭ. Mman va Inan ka nnyinyam ayi ka atak áYesu kəristi uPonzhi a.

9

Inan yak onəm oga aIsarila

¹ Mmami ka nla nnandər wa anəm va uja aKəristi. Mmami ka nnap akwam kat. İdimdim igwak mi ka atak inok aRuhu-Nənan ka nnyam nnap pa

² mmami ka ashe nlak-igwak pa makmak. Igwak mi ka nfe ká izər nrwa va i kap kat.

³ A byen á mi pa ma vyap mi, ma gəlchi mi n le ká izər aKəristi kakul onal mi. Ogənan va í fa ka akum azəngtəng ka oza a.

⁴ Oma oIsarila. Nwur onəm, mí tong ovan Inan te, kakul oza ma. N-ya atak nsat nchumchum ngga apabur te, kakul oza ma. Oma ká nsar nnap-nla va. Oma ka kam nnap-mpakpak ka atak Inan a. Oma ma nyám asal awop aga ashe Nzhi Inan nchumchum óza. Oma kpa ka aboshi nsar nnap-nla.

⁵ Okəka omatmat va te, ojo oza ma. Mi i shal akum amar aKəristi kapambin te, ka akum oza ma. Adəngchi təm aji Inan chit mbyet mbyet. Uwa ishi ka apal ishi iyam pa kpaktak. Nna a təm.

⁶ Iyam va nnap-nla Inan la te, nna ta chwat kat. Kakul nkpaktak onəm va fa ka akum aIsarila te, oIsarila oga nnandər kat.

⁷ Kakul pa oza fa ka akum albərahim te, a nyan chit pa nkpaktak oza ovan albərahim kat. Ma la pa, <<Ovan va ulshaku mar te, oma mí kun ishi ulbərahim ka pa nvan va uza re.>>

⁸ Nna pa ovan albərahim oga afu oma ovan Inan kat. Ovan va Inan ka sar nnap-nləla

úlberahim te, oma ma kun ishi ka pa nvan va uAbərahām re.

⁹ Kaśal va ta ma là nnap nsar nnap-nlà va ta. Pa, <<Azhen ka atak wanta te, mi ga nle mba. Te uSaratu i ga mmār uyen-nungwan.>>

¹⁰ Iyam va ta chwat ka. Ovan va uRifkatu mar te, upo oza pa uzəng. Uwa ukəka yi ulshaku.

¹¹ Kan mí mar ovanjen va ta, oma nyi iyam inənan ká ibəngbəng chit ka te, Inan là iyam va i ga nfa únan oza. Na iyam va Inan dom ka apal ishi ayək wò te, nna a yà. Kan a yà kakul ndak ngga ishi anəm ka. Awór va Inan wór te, nna a yà nnap chwat.

¹² Ma mor ma là únan oza pa, <<Unəngbak i ga ntał uzwal abwakan.>>

¹³ Wa nva ma lir chit ka ashe nnap-nlà Inan pa, <<UYakup uwa n yak. UIshuwa te, n yak na ka.>>

¹⁴ Te iza i là da? Inan yà ka nnandər ka dò? Ko pa dap iyam ro ya pa ka.

¹⁵ Kakul uza là úMusa pa, <<Unəm va pa kpaktak n dom nnyam nrwa igwak á na te, uwa mi nyám á na. Unəm va pa kpaktak n dom n nyám afu-rusok rusok á na te, uwa mi nyám á na.>>

¹⁶ Ya yà chit pa, a yar nnap iyam va unəm a dom, ka te ndak ngga ishi anəm ka. Nnyam nrwa igwak Inan na chwat.

¹⁷ Kakul ka ashe nnap-nlà Inan te, ma lir pa Inan là úFirauna pa, <<N nak bu u yà uponzhi kakul inan iyam pa izən. N dom pa n nyám ichumchum mi ka apal ishi bu na ma nyi adin mi a gang atak ka ashe apambin.>>

¹⁸ Nna pa unəm va pa kpaktak Inan dom nnyam nrwa igwak á na te, uza i nyám. Unəm va nnyi uza

dom ntwat anung igugwak te, uza i nəm.

¹⁹ Dom te, uro ka ashe wo i là pa, <<A ya chit wanta te, iza nak kan Inan ka nya mpat mi na pa har ya? Uda kur ndat na ka nnəm iyam va uza dom ya?>>

²⁰ Ánəm u kur wa ada kan bu dap atam ká Inan ya? Wi, iyam va ma mime te, a kur nla nnap únəm uga mme wò kur pa sang kang u me mi wanta ya dò?

²¹ Uchar uga mme ngbét ya ká ichumchum iga nnuk ame na o kpán ame azəngtəng va ta o me iyám-inok pa dongdong ka kat dò? Uza i dom te, uza i me iyam iga nnəm inok ichumchum. Uza i dom te, uza i me ka ame azəngtəng va ta iyam-inok va ikyin kat.

²² wantana ká Inan kpa kat dò? A ya pa Inan dom nnyam mmən-ikum wò nzəng ka nnak pa ma nyi ichumchum wò kan uza yak pa o kar igwak ka nzhin ka onəm va mà pa oza a fe ka mmən-ikum va ta te, pa uza kur kat a? Onəm va pa ka zhìzhì dò? Onəm va pa uza a zhì te, pa uza kur nkar igwak ka oza kat a?

²³ A ya nnyi pa uza dom pa ma nyi apir mmak ichumchum wò va ji pa kpaktak ónəm va uza ka nnyam nrwa igwak óza te, pa uza kur kat a?

²⁴ Mmayi na uza wór. Uza wór oYahudi ma chwat kat. Onəm va oYahudi kat te, uza wór oza wór na kpa

²⁵ wa nva ma lir ka ashe nnap-nlèla va uHosiya lir pa,

<<Onəm va ka ya onəm mi kat te, mi wór oza pa onəm mi.

Onəm va̱ ka̱ n yak oza̱ ka̱ te, mi yak oza̱.>>

²⁶ Kàdī te,

<<Ka̱ atak azəngtəng va ma là óza̱ pa, <Mmawo onəm Inan ka̱> te,

ka̱ atak va ta mí ga ngwór oza̱ pa̱ ovan Inan uga Iriri.>>

²⁷ UIshaya là nnap-nlà pa̱ gbáṅgbán ka̱ apal ishi oIsarila pa,

<<Ko a yà pa̱ oIsarila a yél ijili a yà wa ashishiri ga anung iwa nggo te, onəm va̱ mí kəmshi oza̱ te, i yél awo ka̱.

²⁸ Kakul uPonzhi-Inan i ga nnəm óza̱ pa̱ kəlak kəlak iyam va uza̱ gəl akwali kwali ápambin chit a.

Uza̱ i nəm uza̱ i re iyam ro i bur ka̱ ka̱.>>

²⁹ Nnap ta̱ dakdak wa nva uYeshayah là chit pa, <<Ká ya pa̱ uPonzhi-Inan uga ichumchum gar abo onəm yi ka̱ te, ká i yà lap ka̱ ká inənan wa onəm oga itong aSədom ka̱ aGomorata.>>

AIsarila ka̱ nnap-nlà Inan ngga nchang nfe

³⁰ Te iza̱ i là ɗa? Onəm va̱ oYahudi ka̱, oza̱ ka̱ nram pa̱ o tong onənan ka̱ mpyal Inan ka̱ te, oza̱ tong chit. Iyam va mí ya ka̱ atak nna nnandər a.

³¹ aIsarila va ɗak ka̱ nram ntong onənan ka̱ mpyal Inan te, oza̱ chu n-yiya ka̱.

³² Iza̱ nak yà? A ma̱t oza̱ ka̱ nya kakul pa̱ oza̱ ram ka̱ ashe nna nnandər ka̱. Oza̱ ram na mí ya ka̱ atak nnəm iyam inəmnəm iga ndak ngga ishi anəm. Te oza̱ ləp ifan ká izər iyam iga nnak onəm i ləp ifan

³³ wa nva ma lir ka̱ ashe nnap-nlà Inan pa,

<<O dər, n li ipang chit iga nnak onəm i ləp ifan
ka ashe aZiyona.

Ipang ichumchum va i nak oza i tak.

Unəm va pa kpaktak dər nkam wò ká izəzər te,
mí na iwuswa á na kaṭ.>>

10

¹ Ógənanɡ, iyam va dom mi ká igwak, ká iyam
va mmami ka nchal ka atak Inan kakul olsarila te,
pa oza a ya nkamshi ngga iriri iga mbyet mbyet.

² Mi nyám nnap nyám ka apal ishi oza pa oza
zhin ka ngwa Inan byet. Ka nna kpa te, ngwa
Inan oza va ta ka ashe nfo.

³ Kakul oza nyi apir asal aga ntong onənan ka
mpyal Inan va chit kaṭ na pa har. A nak te, oza
təm ka mpak asal aga ntong onəm nənan ajo oza.
Oza yan ka asal va Inan pak.

⁴ UKərísti uwa nkùr nnap-mpakpak. Ná nza
unəm nggo va na nnandər na te, uza a tal unənan
ka mpyal Inan.

⁵ Kasal va ta uMusa ka nyám apir ntong onəm
nənan ka mpyal Inan va mí ya ka atak nkpak
nnap-mpakpak a. Uza là pa, <<Unəm va i nəm
iyam va ta te, kaṭətak na uza i lár.>>

⁶ Ka apal ntong onəm nənan ka mpyal Inan va
mí ya ka atak nna nnandər jiwo te, uza là pa,
<<Kan unəm a là ka ashe igwak wò pa uda i kyen
i ba i ga apabur ayi ya kaṭ?>> Nna pa ma kyen ba
ma vang ku uKərísti a.

⁷ Kaṭ te, pa, <<Uda i fər akum ka ashe afu mbin
ayi ya kaṭ?>> Nna pa ma ga ma won ku uKərísti
ka atak ikú a.

⁸ Iza nnap-nlà Inan là yà? Nnap nlà là pa, <<Nnap nlà na yà pa datkulung ka bu. Nnap nlà va ta kaḅeləm bu. Nnap nlà va ta ka ashe igwak bu.>> Nnap nlà va ta nna nnap nna nnandər va mmayi ka nləla ónəm a.

⁹ Nna pa a yà pa unəm bol anung wò là pa, <<UYesu uwa uPonzhi.>> Kang uza na nna nnandər na ka ashe igwak wò pa Inan wong ka na chit ka atak ikú te, ya uza i ya nkamshi ngga iriri iga mbyet mbyet.

¹⁰ Kakul ka ashe igwak yà unəm i na nnandər kang Inan i là á na pa uza tal unənaḅ chit ka mpyal wò. Ka atak mbol anung nla nnap te, uza i ya nkamshi ngga iriri iga mbyet mbyet.

¹¹ Kakul nnap-nlà Inan ka nla pa, <<Unəm va pa kpaktak na nnandər ka na te, mí na iwuswa á na kaṭ.>>

¹² Nnyam nvaḅ ro yà ka ashishe kaṭ, ká ishimshe onəm va oYahudi, ka onəm va oYahudi kaṭ. UPonzhi uzəntən uwa uPonzhi onəm pa kpaktak. Uza i nak nnap nnənaḅ pa makmak ka apal ishi nkpaṭtak onəm va i wór ka ashe adífin.

¹³ Kakul nnap-nlà Inan là pa, <<Unəm va pa kpaktak wór ka ashe adín aPonzhi-Yesu te, uza i ya nkamshi ngga iriri iga mbyet mbyet.>>

¹⁴ Chit te, i yar sang kang oza i wór ka ashe adín anəm va oza na nnandər ka na kaṭ yà? Nna-nnandər nggo te, i yar sang kang oza i na nnandər ku unəm va oma fe iyam ro chit ka apal ishishi kaṭ yà? Nfe nnap nggo ka apal ishi anəm te, i yar sang kang oza i fe a yà pa unəm ro là óza kaṭ yà?

15 I yar sang kang unəm i là nnap ka oza a ya pa ma re na re ka atak oza ka ya? I ya wa nva ma lir ka ashe nnap-nlà Inan pa,

<<Mba onəm oga nra nggang ka nnap-nlà ngga nchang nfe ka atak te, a byen pari.>>

16 Ka nna kpa te, nkpaktak oIsarila man ka nnap-nlà ngga nchang nfe va ta ka. Kakul uYeshayah ka ishi wò te, uza là pa,

<<ÁPonzhi-Inan, nza unəm pa wat i na nnandər na ka nnap-nlà yi ya?>>

17 Te ya nyám chit pa unəm i na nnandər ka atak nfe nnap-nlà Inan. Nnap nlà va mí fe nnyi te, nnap-nlà aKərísti.

18 Te re m bəp ɖak pa oma fe nnap-nlà va ta chit ka dò? Oza fe chit. Kakul nnap-nlà Inan là pa, <<Achu onəm oga nre mi gang apambin chit pa lat.

Nnap nlà va fa kaɓələm oza te, a chu akum-ɓubur chit.>>

19 M bəp kàɖi pa oIsarila pa te, oza kpán ipir nnap nlà va ta ka dò? Ngəshi te, uMusa là pa,

<<Mi nak ikpar i nəm wo ka atak onəm va kur onəm ka a.

Mi nak igwak i lak wo ka atak onəm oga mbin va nyi iyaŋ ro ka a.>>

20 UIshaya ləla nzəng ka nkam igwak pa Inan là pa,

<<Onəm va ram mi ka te, oza ya mi chit.

N nyám ishi mi chit ónəm va bəp atak mi ka.>>

21 Kapital-ishi nnap oIsarila jiwo te, Inan là pa,

<<N yichi awo mi óza alum a ga tar mi pa chit kaŋunun.

N yichi awo mi ónəm oga nlan nkpak nnap nnəm.

Onəm oga nkak ishi oga nfe nnap kaṭ.>>

11

*Nnyam nrwa igwak Inan
ka apal ishi abo nvaṇ oIsarila*

¹ Te mmami ka n bəp pa a nyan chit dak pa Inan yan ka onəm wò yan dò? Ko pa dap iyam ro ya pa kaṭ. Mmami ka ishi mi te, mmami uzəntən ka ashe onəm oga akum ijili aIbərahim. Mmami apir aBenjamin.

² Ko pa dap Inan gaḃan asəm na ónəm wò va uza yak oza chit matmat kan ma nəm apambin kaṭ. O nyi iyam va nnap-nlà Inan là ka atak va ma là nnap ka apal ishi alliya kaṭ dò? Nna asal va uza ga ka ayən ka mpyal Inan ka apal ishi nnap nnəm oIsarila pa,

³ <<ÁPonzhi-Inan,
oza gbaṅg onəm oga *nkam nre ka atak bu chit pa kpaktak.
Oza shin atak nshi iyam awop abu chit pa kpaktak kpa.

Mmami na pa uzəng bur ka nkukwa ka ashe onəm oga nkam nre ka atak bu.

ká nnà te, oza ka ndak pa na o gbaṭ mi kpa.>>

⁴ Amaṇ va ta Inan na á na kaṭ dò? Nna pa,
<<Nna n gar kakul ishi mi onəm ikalong pa ifangshat va oma wop ichər va mí wór pa uBa'al chit kaṭ a.>>

⁵ Wantana ka ashe nra va ta te, abo onəm Inan oma yà va uza yak chit ka atak nnap nnənan wò.

⁶ A ya chit pa ka atak nnap nnənan te, ya a yar iyam-inəmnəm iga ndak ngga ishi anəm kaṭ. Ka

ya pa_ka atak iyam-inəmnəm iga ndak ngga ishi anəm na te, ya nnap nnənaṅ sat nnap nnənaṅ lap kaṭ.

⁷ Chit te, san da? Te yà nyám chit pa_iam va oIsarila ram oza_ ya kaṭ te, onəm-yákyàk ya chit, kakul abo oza_ twat anung igwák oza_

⁸ wa nva ma lir ka_ ashe nnap-nlà Inan pa, <<Inan le ka_ oza_ re tan təm ka_ ashe nnap nnəm ngga nku igwák.

Uza_ na iwú óza_ kan oza_ i ya atak kaṭ.

Uza_ na achwang oza_ kan a kpang i fe iyam ro kaṭ.

Oza_ təm pa har ba chu nda va ta_>>

⁹ UDawuda là pa,

<<Re nri iyam iriri oza, ká iwawa a sat ajəp óza.

Re a sat icá iga nlwàk oza_ kpa.

Re nna a sat ipán iga nnak oza_ i ru.

Iyam-ina va_ oza_ yar pa_ o nəm te, a le a təm óma.

¹⁰ Iwú oza_ ka_ fo na oza_ ka_ ya atak kaṭ.

Wa gur asəm ka_ oza_ ka_ mbək anung mbyet mbyet.>>

Iriri kakul abo onəm

¹¹ Mmami ka_ n bəp kàdi pa, oza_ ləp ifan te, oza_ ru nru nva pa_ oza_ i won lap kaṭ dō? Ko pa_ dap pa kaṭ. Kakul nru oza_ va_ ta_ ba_ ka_ ngwon onəm va_ oYahudi kaṭ. A nak iriri iga mbyet mbyet sat ijo oza_ na a nak ikpar a nəm oIsarila.

¹² A yà pa_ apambin dur ka_ atak mpat-nnap oza_ na, har onəm va_ oYahudi kaṭ dur ka_ atak nru oza_ na kpa te, oza_ i le atak Inan pa_ kpaktak te, mí dur i mak nza_ apir mmak yà?

¹³ Mmami ka_ nla nnap ká wo onəm va_ oYahudi kaṭ a. A ya chit pa_ mmami na unəm uga nre

aKeristi ka_kul onəm va oYahudi ka_t te, mmami ka_nlan ka_inok mi ka_nkak.

¹⁴ Na a nak ikpar a nəm oYahudi nzəng ka_nrəng pa_mo te, ikpar a nəm onəm yi na oza_a ya iriri iga mbyet mbyet.

¹⁵ A ya pa_ma ngwan inal ka_ishimshe apambin ka_Inan ka_kul mmandar oza_va ma mandar te, ya nle nka_m oza_kadi i ya ngwon ka_atak ikú ka_t dō?

¹⁶ A ya pa_mma_k iyam izhakan va_ma kál ma yichi íNan iyam inana inənan te, ya abo mma_k va_ta nnənan na kpa ka_t dō? Ikun kang alələng anənan te, ya igwong ikún va_ta i ya inənan na kpa ka_t dō?

¹⁷ Ma kyen igwong ikún va_ta iro chit le atak ma gwang ivang á na ka_azaitun aga anyin va mmawó a. Ma gwang ivang awo na o fe nchang nzəng ka_oza_ndəng ka_iyam-nri va aləng ikún azaitun asuksuk va_ta ka_mba ka.

¹⁸ Ka_kul nva_ta te, kan o nyám nrup ka_ishi igwong va_ma kyen le ka_t. A ya pa_o nəm pa_jak te, re o fe iyam va_ta. Mmawo na o kpán aləng o sat ka_ka_t. Aləng na kpán wo sat ka.

¹⁹ Dom te, uro ka_ashe wo i là pa, <<Ma kyen igón va_ta le na a na atak ma gwang ivang mmami na ka_izər ikún va_ta ka_t dō?>>

²⁰ M ma_n pa_wa nnà ta. Ka_nna kpa te, o nyi pa_kpátkpát pa_ma kyen oza_le ka_kul nyang ka_nna nnandər oza. Mmawo nnyi te, o ya ntar ka_atak nna nnandər. Kan o fam ka_t. O ra ayər Inan.

²¹ Ka_kul a ya pa_Inan gar igón ikún isuksuk va_ta ka_t te, ya uza_i gar wo ka_t na kpa.

²² Ka_kul nva_ta te, o dər apir nnyi-nnap Inan ká

isəsai. Onəm va le ka asəsai re te, uza ka nsam ka oza. Mmawo te, uza ka nnyam nnyi-nnap awo, a ya pa o le ka asəsai o re kaṭ a. Kaṭ te, mí gəl wo i le ká izəzər na kpa.

²³ A ya pa oza ga mpyal ka nyang ka nna nnandər kaṭ te, mí le ka oza i ba mí gwang ivang óza ka atak nvəvaṅ. Kakul Inan uwa ya ká ichumchum iga nle ngwang ivang óza kadi ka atak nvəvaṅ.

²⁴ A ya pa ma kyen mmawó va wa azaitun aga anyin ba ma gwang ivang awo ka azaitun asuksuk kan a kpəkpán te, mí gwang ivang azaitun asuksuk ká izər inan wò te, i mor i kpán nza apir nkpán ya? Kakul pa wat te, nkàm kang ngwang ivang iyam iga anyin ká isuksuk i kpán.

Mi i kamshi oIsarila pa kpaktak

²⁵ Ógənaṅ, n dom wo dom pa o nyi nnap-mbwambwam va ta. Kakul kan o rən pa ka nva mmawó kasəsai kaṭ. Ntwat anung igwak oIsarila mbyet kaṭ. Anun-igwak na ka ntwat ka oza na onəm va oYahudi kaṭ, kan oza wa Inan te, oza a ba a yəl oza a chu iyəl va ma nak chit.

²⁶ Kasai va ta te, mí kamshi nkpaktak oIsarila kam wa nva ma lir chit ka ashe nnap-nlà Inan pa,

<<Unəm uga njul onəm i fa ka aZiyona.

Uza i bak nyang ngwa Inan i fa ka ashe akum ijili aYakubu.

²⁷ Anung va ta n na óza asóngsóng, nva mi won pa n yar nnap-mbángbaṅ oza óza a.>>

²⁸ Ka apal nnap mman ka nnap-nlà Inan ngga nchang nfe jiwo te, oza tong onəm oga nyang

Inan na a kamshi mmawó na. Ka apal nnap ayàk Inan jiwo te, oza byen ka okèka oza kan oza ya omanman.

²⁹ Kakul imwa Inan ka awuwór tèm ntèm oza chit. Uza i le nvan ka oza kat.

³⁰ Ka ya te, kò ò ya onəm oga nyang nkpak nnap nnəm íNan. Kan nyangmata te, o ya nnyam nrwa igwak Inan chit kakul nlan nkpak nnap nnəm oIsarila.

³¹ wantana kpa nyangmata oza va ka ashe nlan nkpak nnap nnəm te, nyangmata te, ma nyám nrwa igwak Inan óza chit kpa wa nva ma nyám awo a.

³² Kakul Inan gwang onəm pa kpaktak chit re tèm ka ashe nlan nkpak nnap nnəm na o nyám nrwa igwak wo óza pa kpaktak.

³³ Ngbàng aghan Inan ka nnyinyi ya ka nla kat. Akwali va uza i nap te, a gbàng nva pa unəm a kpán ipipir kat. Asa va uza i wòl kà te, asa va pa unəm a wa nvəvang a ga a nyi kat.

³⁴ <<Uda nyi iyam va nyi ka ashe igwak Inan ya? Kat te, unəm ro yiyà uga nna ichən á na dò?>>

³⁵ <<Uda kur nna imwa ro íNan pa Inan a mwa akèkat a wò ya?>>

³⁶ Kakul katetak na iyam pa kpaktak fa. Ka atetak na kpa mí ya iyam pa kpaktak. Iyam pa kpaktak ijini. Ichumchum iga ibyen a tèm ijini mbyet mbyet. Nna a tèm.

12

Nnap-nnəm ngga mmà unəm uga nnəm inok Inan

¹ Nna nak te, ógənanɡ, mmami ka nchal wó kakul mmak nrwa ɔgwak Inan te, re ó yichi izər wó á na wa iyam ipapa iga nshi iga iriri va inənan adak ro ya ka kat a. Iyam ipápà va Inan i məman ka. Iyam va nna awop wo aga nnandər.

² Kang ó təm apir ntəm va pa səlak ka nnap nnəm ngga apambin va ta lap kat. Re ó gaɓan nnap nnəm wó ká inənan ka atak apir nrəng nnap mpipe. Nna chit te, ó nyi iyam va Inan ɗom inənan, ká iyam va uza i kəkam, ká iyam va kukur.

³ Kakul nnap nnənan va Inan na mi te, mmami ka nla nnap ku únza uzəntən wo nggo pa kan unəm a yar ishi wò a ji nkam iyam va uza kat. Iyam va mà te, re unəm a yar ishi wò a mal dakdak ka atak n-yi wò, a mal ka nnap nnənan va Inan na á na a.

⁴ Wa nva oga mban-izər pa ɗongɗong gwang ká izər pa izəng te, oga mban-izər va ta ka nnəm apir inok pa izəng kat.

⁵ wantana ka yi kpa. Ka ashe aKəristi te, mmayi pa kyak kang i gwang chit i nyang wa izər pa izəng. Nza uzəngtəng yi nggo te, uza mban-izər awan wò.

⁶ Mmayi ka aghan Inan aga nnyi nnəm nnap apir pa ɗongɗong mà dakdak ka nnap nnənan va ma na yi. Kakul nva ta te, re i nəm inok ka. A yà pa aghan aga nnyi nnəm nnap va unəm ka aga nnyi nla nnap-nla va unəm kam ka atak Inan te, re uza a nəm inok ka ka atak n-yi nna nnandər va uza ka a.

⁷ A yà pa nnyi nnakshi ka onəm te, re uza a nakshi ka onəm. A yà pa nnyi ndyang nnap-nla

Inan te, re uza a dyang.

⁸ A yà pà nnyi nnak ìgwak onəm i kam te, re uza a nak ìgwak a kam onəm. A yà pà nnyi nna iyam kakul onəm va ka ashe nlan te, re uza a na ká ìgwak pà izən. A yà pà nnyi ngga ka onəm te, re uza a kpak oza anyan ro a yà ka ashishe kat. A yà pà nnyi nnyam nrwa ìgwak ónəm te, re uza a nyám nzəng ka nchang ìgwak.

Iwon ka apal ishi ntəm onəm oga ngwa Inan

⁹ Re mman a ya ngga nnandər. Iyam va ina pà kpaktak te, o yan pà gənggəng. Re o bur ka nkam iyam va kpaktak inənan a.

¹⁰ Kapal-ishi nnap mman ogənan oga ngwa Inan te, o man owan wo pà gənggəng. Ka apal nnap nna ichumchum ówan wo te, o nyan owan wo ka nnəna.

¹¹ Kan nzhin ká inok a rwam wo kat. O mak apər ka nnap ngga aruhu ka nnəm inok aPonzhi-Yesu inənan.

¹² Re nnak-ìgwak wo ká Inan a yà nzəng ka ntəm ka ashe nchang ìgwak. O kar ìgwak ka ndaktak. O ɗak ka ashe nnəm aduwa.

¹³ O kamshi ogənan oga ngwa Inan va ka ashe nlan. O kam onəmchən nzəng ka mban-awu ro kat.

¹⁴ O far nnap nnənan Inan ónəm va ka nnyan ká wo. Kan o far iyam bəngbəng óza kat. O far nnap nnənan na óza.

¹⁵ Onəm va ka ashe nchang ìgwak te, o kamshi oza ka ntəm ka ashe nchang ìgwak va ta. Onəm va nnyi ka ntəm ka ashe nlak-ìgwak te, o sak oza sak ka nlak-ìgwak va ta.

¹⁶ Kan o gbak izər kat. O tēm ntēm ikángkáng ká izəzər. Kan o rup ká ishi kat. Inok a yen wa nsan nggo te, o nənəm. Kan o rən pa aghan wo ka nva kaşəsəl kat dō kat.

¹⁷ Onəm a nəm iyam ina awo te, kan o pyát akəkat ká iyam ina kat. O yar nrən-nnap ka nnəm iyam va onəm pa kpaktak i mañ ka pa inənan a.

¹⁸ A yà pa i nənəm te, ka re ka anung njiwo te, kò o tēm ntēm ngga ikángkáng ka onəm pa kpaktak.

¹⁹ Ónəm mi omañmañ, kan o pyát akat nnap únəm ro kat. O re kan mmən-ikum Inan i nyi ka oza. Ka kul ma lir ka ashe nnap-nlà Inan pa, <<Mpyát akat nnap te, ka kul mi. Mi pyát akat nnap pyát.>>

²⁰ Iyam va mà pa o nəm te, o nəm wa nva ma là ka ashe nnap-nlà Inan pa, <<A yà pa ayan ka nji unəm uga nyang bu te, wa kan na ká iyam-nrì.

A yà pa ndəng gba na te, wa na ndəng á na a wa. Ka kul ka atak nnəm iyam inənan va ta á na te, i lok na wa unəm a nak amor apər á na ká ishi.>>

²¹ Kan o mañ ina a nəm igwan ka apal ishi wo kat. Re o nəm igwan ka apal ishi ina ka atak nnəm iyam inənan.

13

Nkpak nnap nnəm óponzhi

¹ Ko uza unəm nggo te, uza a kpak nnap nnəm ónəm-chumchum oga nnəm ka mbin. Ka kul

ichumchum ro yà kaṭ, ya Inan a pak chwat. Ichumchum na pa kpaktak te, Inan a pak tēm.

² Kaṭul nva ta te, unəm va yan nfe onəm ochumchum oga nnəm ka mbin te, ya uza yan nfe onəm va Inan a kyep oza a. Onəm oga nnəm apir iyaṃ va ta ka ndap akwali íshi oza.

³ Kaṭul onəm ochumchum oga nnəm ka mbin, onəm oga nyar nlilyat kò onəm oga nnəm iyaṃ nənnaṇ kaṭ. Onəm oga nnəm iyaṃ bángbàng oma chwat i ra ayèr oza. U dom pa kan ayèr anəm uga nnəm ka mbin a nəm bu kaṭ dō? Ya nəm iyaṃ nənnaṇ na uza a dèngchi bu.

⁴ Kaṭul uza unəm uga nnəm inok Inan uga nnəm iyaṃ va i kaṃshi bu. A ya nnyi pa mmaḃu ka nnəm iyaṃ íbàngbàng te, ya nəm ayèyèr. Kaṭul ndokchi ichumchum va uza ka te, uza kpán pa mwan kaṭ. Uza unəm uga nnəm inok Inan va i nyám ntan únəm uga nnəm iyaṃ ina ka atak nfél-ìgwak.

⁵ Kaṭul nva ta te, a mèmà pa ma kpak nnap nnəm ónəm-chumchum oga nnəm ka mbin. Mi i kpak óza kaṭul ayèr nnyam ntan na chwat kaṭ. Mi i kpak óza kpa kaṭul iyaṃ va ta ìdimdim ìgwak ka nla pa ma nəm a.

⁶ Kaṭul nnap nzəngtən va ta kpa mmawó ka mmwa agando. Kaṭul onəm ochumchum oga nnəm ka mbin oza onəm oga nnəm inok íNan va ma na atak nsat óza chit pa kpaktak ka anung nnəm inok va ta.

⁷ Re o mwa únza unəm nggo iyaṃ va bur. A yà pa agando a bur te, re o mwa. A yà pa mbwai idur mbin te, re o mwa ónəm oga nkukwap. A yà pa

nnak inəm únəm va mèmà pā ma nak á na te, re ma nak inəm á na. Unəm va nnyi mà pā ma na ichumchum á na te, re ma na ichumchum á na.

⁸ Kan o re akat iyām ro a tēm awo ká ishi kat, ya akat mman owan wo chwat. Kakul unəm va ka mman uwan wò te, ya uza gbal ka nkpak nnap-mpakpak chit.

⁹ Nnap mpakpak va pa, <<Kan wa ra uchar anəm kat, kang wa gbal unəm kat, kan wa nēm ayi kat, kang wa gwáng iyām awan bu kat>> ka aboshi nnap-mpakpak te, ma gwang oza pa buruk chit ka ashe nnap-nlā ngga nzəng va ta. Nna pa, <<Wa man uwan bu wa nva mmabu ka mman ishi bu a.>>

¹⁰ Unəm va ka mman te, i nēm iyām-ina ro úwan wò kat. Kakul nva ta te, mman unəm nnà sat n-yél nkpak nkpaktak nnap-mpakpak.

¹¹ O nēm iyām va ta nzəng ka nnyi apir nra va mmayi ka ashishe nyangmata. Alum kur chit pa o yendal ká iwu nda. Kakul nyangmata te, nkamshi ngga nna iriri iga mbyet mbyet ayi va te, nrəra ba datkulung chit ji mmatmat ji, nva ká i na nnandər mpyal a.

¹² Atak dat chit ka ntan. Alum kur n-yendal chit. Kakul nva ta te, re i re nnēm apir iyām iga afap. I sham izər ká iyām-wór onəm oga atak atántàn na.

¹³ Iyām va i nēm te, a sat nzwan pa kwar wa iyām va ma nēm ka alum. Kang a yà nzwar ka ngbap nzam kat. Kang a yà nran ka nchè kat. Kang a yà nnēm ilakchi, ka mmai, ka ngbang ikum, ka nkpar ikpar kat.

¹⁴ Iyām va mà pā ma nēm te, re o yar nnap nnēm nja aPonzhi-Yesu Kēristi. Kan o tēm ka nrēng asal va o nēm kang o nēm iyām va nnap nnēm wo ngga izēr dōm kat.

14

Kan o nak mpat ówan wo kat

¹ Unēm va nna nnandēr nandēr na kam chit kat te, o kam na kam wa agēnang ka nna. Kan ndap-atam ka apal ishi iyām ro a gwang wo ka na kat.

² Unēm ro te, nna nnandēr nandēr mān á na mān pā uza a ri ka iza iyām nggo. Uro nnyi te, nna nnandēr nandēr kam kat te, uza i ri iyām-nrì va azáng na chwat.

³ Unēm va i ri nza iyām nggo te, kang uza a bak unēm uga ntap iyām-nrì kat. Unēm va i yak iyām-nrì yak te, kan uza a là únēm uga nrì nza iyām nggo pā uza pat nnap chit kat. Kākul Inan mān ka na mān.

⁴ U kur wa ada nnyi kan bu nak mpat úzwal anēm-kak yà? Nsat nkam nggo te, uza i sat únēm ga nzhi wò na. Nlèp ifan nggo te, ya uza i ru únēm ga nzhi wò na kpa. Ko pā dap uza i lèp ifan kat. Kākul uPonzhi-Inan kukur pā o nak na a sat a kam.

⁵ Unēm ro i yar pā ka ashe nrá te, nro ji ngwan wò ji kākul nva ta n-yèyèr. Unēm ro nnyi te, nkpaktak oza iyām-izəntən katətak. Iyām va pā kpaktak unēm yar pā nna nnap te, re uza a nyi pā kpátkpát ka ashe igwak wò pā iyām va ta wanta na nnan.

⁶ Unēm va yar pā nra ro yèyèr te, uza yar pā kākul nna ichumchum íNan. Unēm va i ri nza

apir izhé nggo te, uza ri kakul nna ichumchum íNan. Kakul uza ka nna adəngchi íNan kaku-kul. Unəm va nnyi yan ka nri izhé pa vava te, uza nəm kakul nna ichumchum íNan. Kakul uza ka nna adəngchi íNan kakukul.

⁷ Kakul unəm ro ya ka ashe yi uva təm kakul ishi wò ka nkukwa kat. Unəm ro ya ka ashe yi i ku ka ishi wò kat kpa.

⁸ A ya pa nna i ya ka n-yi n-yi te, i təm kakul nna ichumchum íNan. A ya pa i re n-yi n-yi i ku chit te, re i ku kakul nna ichumchum íNan na kpa. Ko a ya pa mmayi ka n-yi n-yi, ka a ya pa mmayi ka n-yi n-yi kat te, mmayi onəm aPonzhi Inan.

⁹ Kakul iyam va ta na pa wat uKəristi ku. Uza won ka atak ikú na uza a tal uPonzhi onəm va oma ku chit kat, ka onəm va ku chit.

¹⁰ Nna kan mmabu nnyi te, sang kang bu nak mpat úwan bu ya? Iza nak kan bu bak uwan bu ya? Kakul nkpaktak yi i ga ntong ka mpyal atak ntəm ngga nnap-akwali Inan.

¹¹ Ma lir pa Inan là pa,

<<N son anung kam pa gənggəng ka adin Inan uga Iriri pa,

<Nza unəm nggo te, i ga nkuchi ká irən ka mpyal mí wop mi.>

<Nza unəm nggo te, uza i bol anung i là ká ishi wò pa mmami na Inan.> >>

¹² Kakul nva ta te, ilum sur ro te, nza uzəntən yi nggo i ga nshal ka mpyal Inan ka anung wò nkpaktak iyam va unəm nəm.

Kan wa nak uwan bu a ləp ifan kat

¹³ Kaḱul nva ta te, kan i ya owan yi ka mpat ro lap kaṭ. Iyaṃ va mà pa unəm a nəm te, re uza a yar ka ashe igwak wò pa kan mmawò na o sat iyaṃ iga nnak ugənanang wò a ləp ifan kaṭ. Kan uza a maṇ a yà iyaṃ iga nzwan asal ku uwan wò kaṭ kpa.

¹⁴ N nyinyi har mi ləla ka ashe adin aPonzhi Yesu-Kəristi pa iyaṃ-nrì ro yà va pa i yèr unəm uga ngwa Inan kaṭ. A yà pa unəm yar apir iyaṃ-nrì ro pa i yèr wò te, kaṭətak te, a sat iyaṃ iyəryèr chit.

¹⁵ A yà pa iyaṃ va u yan jak mmabu ka nriri kan ka nnak igwak awan bu ra kaṭ te, ya mman yà ka ashe ntəm bu kaṭ. Kan wa maṇ iyaṃ va mmabu ka nriri a sat iyaṃ iga nnak na a zhì kaṭ. Uza va uKəristi ku chit kaḱu-kul a.

¹⁶ Kaḱul nva ta te, iyaṃ va u yar pa biḃyen te, kan wa maṇ ma là pa iyaṃ-ibəngbang kaṭ.

¹⁷ Kaḱul iponzhi Inan pa te, nnap iyaṃ irirí ká iyaṃ iwawa kaṭ. Iponzhi Inan nnap ntaḷ unənan ka mpyal Inan, ka ntəm ka ashe nra-igwak, ka ntəm ka ashe nchang igwak va aRuhu-Nənan i ba ka.

¹⁸ Unəm va pa kpaktak ka nnəm inok aKəristi kaṣal va ta te, ya uza sat unəm va chit Inan i fe nchang ka na. Onəm i maṇ ka na maṇ kpa.

¹⁹ Kaḱul nva ta te, re i pá apər ka nnəm apir iyaṃ va i ba ka ntəm-ikankan ka mme onəm i kam.

²⁰ Kan o maṇ o vyap inok Inan kaḱul nnap iyaṃ irirí kaṭ. Nza apir iyaṃ nggo te, a biḃyen. Ka nna kpa te, a yà pa unəm yan jak i ri iyaṃ va i nak uwan wò i ləp ifan te, ya uza nəm byen kaṭ.

²¹ Nva pa unəm a ri izhé, kaṭ te uza a wa ndəng ibangbang, kaṭ te uza a nəm nza apir iyaṃ nggo va i nak ugənanang i ru te, ya kapkap pa uza a nəm iyaṃ va ta kaṭ. Nna byen ji.

²² Mmabu ka nna nnandər dō? Re a yà nnap va ká ishimshe bu ká Inan. Nnap-nnənan na yà ka apal ishi anəm va igugwak rəra ka anung nnəm iyaṃ va nnap-nnənəm nyám á na pa a dakdak a.

²³ Unəm va nnyi ka nkat amar ka apal ishi nri iyaṃ-nri kan uza ri ká nnà te, ya uza pat nnap iNan chit kakul uza ri iyaṃ va ta ka ashe nggam, nna nnandər yà ka kaṭ. Iyaṃ va pa kpaktak unəm nəm nzəng ka nna nnandər kaṭ te, iyaṃ va ta nnap-mbāngbang.

15

Nnak igwak awan bu pa a chang nna rwa ji

¹ Mmayi va i kəkam ka ashe nna nnandər te, a mà pa onəm va kam kaṭ te, i təp awo ózà kà nyar idək ndaktak oza. Kan i nəm iyaṃ ka ndom ishi kaṭ.

² Re nza uzəntən yi nggo te, a nəm iyaṃ va i chəchan ku uwan wò. Uza a nəm iyaṃ va i kamshishi kam, kan i me na me kpa a.

³ Kakul ka uKəristi ká ishi wò te, iyaṃ va uza nəm te, iga ndom ishi kaṭ. Ma lir ka ashe nnap-nlà Inan pa,

<<Mpwat va onəm ka pwat bu te, a le chit təm mmami na ká ishi.>>

⁴ Iyaṃ va pa kpaktak ma lir matmat ka ashe nnap-nlà Inan te, ma lir pa na a dyaṅ iyaṃ ayi, na asak va ka ashe nnap-nlà Inan i kam nzəng ka

nkar ìgwak te, oza a nak yi i tēm ka ashe nnak-ìgwak.

⁵ Re Inan va i na nkar-ìgwak ka nkam-ìgwak kpa te, uza a na apir ìgwak awo iga ntēm ntēm ngga ngwan ishi ká izəzər. Uza a na wo ka ashe ntēm wo ngga nyar nvan aYesu kəristi,

⁶ na o na ichumchum íNan anung wo a yà pa zən. Igwak wo pa kpaktak a məman ka kpa. Inan va uwa Inan kan uwa uPo aPonzhi yi uYesu Kəristi kpa a.

*Nnap nlà Inan ngga nchang nfe
kakul onəm va oYahudi kat*

⁷ Kakul nva ta te, o man ka owan wo man wa nva uKəristi man ká wo, na a ba ka nna ichumchum íNan.

⁸ Re í là awo. UKəristi tal uzwal oYahudi kakul nnyam nnandər Inan na a nyám pa nkpktak nsar nnap-nlà va Inan ka sar ókəka yi omatmat te, uza i yéyél.

⁹ Onəm va oYahudi kat nnyi te, oza a na ichumchum íNan kpa kakul nrwa-igugwak. A mà dakdak wa nva ma lir ka ashe nnap-nlà Inan pa, <<Kakul nva ta te, mi bol anung mi na adəngchi abu ka mpyal onəm va uYahudi kat.

Mi shi nnap-nshì, mi shep adin bu ka kpa.>>

¹⁰ Nnap nlà Inan là kàfi pa,

<<Ónəm va aYahudi kat, o tēm ka ashe nchang ìgwak nzəng ka onənəm.

Ónəm va oYahudi kat, o lan nzəng ka onənəm.>>

¹¹ A là kàfi pa,

<<O na adəngchi íNan nkpktak wo va onəm va oYahudi kat a.

Ónəm pa kpaktak, o shi nnap-nshì ngga nna
adəngchi á na.>>

¹² Kàdī te, uYeshayah là kpa pa,

<<Unəm uga akum ijili aJesi ka mba nfa.

Unəm va i fa i nəm ichumchum ka apal ishi
nkpaktak oga akum ijili.

Uwa onəm va oYahudi ka te, i nak igwak ka.>>

¹³ Re Inan va uwa i nak unəm i nak igwák ka nnap
te, uza a nak igwak wo a chang pa makmak. Uza a
na nra-igwak mmakmak awo kakul nna nnander
wo. Na o nak igwák wo kù uwa pa gənggəng ka
atak ichumchum aRuhu-Nənan.

Ntəm ka atak ichumchum aRuhu-Nənan

¹⁴ Ógənan mi, mmami ká ishi mi te, m məman
pa mmawó ká ishi wo te, mmawó onəm oga nnyi-
nnap pa gənggəng. Onəm va nnyi iyam wo mak
pa gənggəng. O kur ndyang iyam ówan wo kur.

¹⁵ Ka nna kpa te, nnap va n lir awo te, n lir nnap
kəkam ka apal ishi nró na n rən awo. N là kakul
nnap nnənan va Inan na mi

¹⁶ nva uza nak mi chit unəm uga nnəm inok
aYesu kəristi ónəm va oYahudi ka a. Inan nak mi
ka nnəm inok nla nnap-nləla ngga nchang nfe wa
anəm uga nshi iyam awop na onəm va oYahudi
ka te, oza a tong wa iyam ipápà kakul nshi va
Inan məman ka. Iyam va aRuhu nənan a nal a.

¹⁷ Kakul nva ta te, mi lan ka ashe aYesu kəristi
kakul inok va mmami ka nnənəm Inan te, a yiyà
ká ipir.

¹⁸ Ko pa dap anung i pat ka mi mi là iyam ro
ka, ya iyam va chwat uKəristi nəm ka atak nnəm
inok ka mi kakul mba ka onəm va oYahudi ka,

na oza a kpak nnap nnəm íNan ka atak iyam va uKeristi nak mi n là ká iyam va n nəm kpa a.

¹⁹ Oza i ya ka atak iyam ichumchum iga ndaktak pa dongdong. Oza i kpak nnap nnəm va ta ka atak ichumchum aRuhu-Nənan. A nak te, a won ka aUrushelima ka abo mbin ngga atak va ta ga chu allirikum te, n là nnap-nlà aKeristi ngga nchang nfe chit, ka n re abubo kat.

²⁰ Nnap va n yar anyinyam te, nna pa n là nnap-nlà Inan ngga nchang nfe ka atak va na ma fe adin aKeristi chit kat. Na a ya pa kan mà me nzhi va unəm ukak a ban akukum kat.

²¹ Mi nəm i mal dakdak wa nva ma lir ka ashe nnap-nlà Inan pa,
<<Onəm va ma là nnənap óza chit kat te, oza i nyi na.
Onəm va oma fe nnənap chit kat te, oza i ga nkpán ipipir.>>

UBulus damshi izər kakul ngga aRom

²² Iyam va ta nak te, nvan pa nkyak mba atak wo nna ka mbar mi.

²³ N-yanmata jiwo te, n gbal inok ka mbin ngga atak va ta chit. Kakul pa ayan nya wo va pak inok nji mi chit izun pa makmak te,

²⁴ n nak igwak nya wo kan mi watar mi ga mbin Asabaniya. Mi sat ka atak wo pa dap mi jul izər nzəng ka nfe nchang ntəm nzəng ká wo. Nna chit te, o kamshi mi ka nnap achen mi aga ngga atak va ta.

²⁵ N-yanmata te, mmami ka ngga aUrushelima kakul ngga ka nkamshi onəm Inan.

²⁶ Ogənan oga mbin aMakidoniya ka Akaya ya bibyen ka oza pa oza a kwap iyam kakul

nkamshi ogənan oga nkun ka ashe onəm Inan oga aUrushelima.

²⁷ Oza ya nnəm pa chəchan ka oza. Nnandər te, nnəm pa sat óza wa akat ká ishi. Kákul a yà pa onəm va oYahudi kat kan ka nfe nchang nzəng ka oYahudi nnap-nənan va Inan ka sar nnənap óma chwat te, a sat nnap ga nkpak pa oza a fe nchang iyam iga apambin nzəng ka oYahudi.

²⁸ Ka nvangva mi gbal ka ngga ka nre va ta mi yichi nkpaktak kpaktak óza te, mi wòl atak wo kan mi watar mi ga mbin Asabaniya.

²⁹ N nyinyi pa mi ba atak wo te, mi ba ka nnap nnənan aKərísti awo abubo ro i bur kat.

³⁰ Ógənan, mmami ka nchal wo ka ashe adin aPonzhi yi uYesu Kərísti ka mman va aRuhu-Nənan i na te, mmami ka nchal wo pa o kamshi mi ka nnəm aduwa íNan

³¹ na uza a nak n fa ká ikángkáng ka mbin aYahudiya kan onəm va na nnandər ká Inan kat te, oza a nak ishi a nan mi kat. Uza a nak inok mi ka aUrushelima a sat iyam va onəm Inan oga atak va ta i məman ka kpa.

³² Nna chit te, a yà pa Inan məman te, mi ba atak wo ka ashe nchang igwak na n jul izər ka atak wo.

³³ Re Inan uga nna nra-igwak a təm nzəng ká wo pa kpaktak. Nna a təm.

16

Nre-anung

¹ N dom pa_ń là awo pa_uFibi ugənanɡ yi uchar uza_uchar unandər va i nəm inok ka_ashe ikilisiya iga aKankiriya.

² O kam na kam ka_atak wo ka_ashe adin aPonzhi-Yesu wa nva a mà nnəm ónəm va oji Inan a. Nkamshi va pa_kpaktak uza_a ram ka_atak wò te, o na á na na. Kakul uza_ká ishi wò te, uza_kamshi onəm chit pa_kyak. Mmami uzəntən ka_ashe onəm va_ta.

³ O re anung re úAkila á mi ka, ka_uchar wò uBərisila. Oza_onəm oga nnəm inok aYesu kəristi nzəng ka_mi.

⁴ Oza_yang ká iriri oza_kakul mi. Mmami na chwat ka_ndəngchi oza_kat. Nkpaktak onəm oga ngwa Inan va oYahudi kat, ka_atak pa_dongdong ka_nna adəngchi óza_na kpa.

⁵ O re anung re á mi ká ikilisiya va_ka_mbut ka_nzhi oza_. O re anung re úlpenitus ukpa mi umanman va uwa unəm uga ngəshi va na nnandər ku uKəristi ka_ashe mbin Asiya a.

⁶ O re anung re úMaryamu ka. Uza_va nəm inok byet kakul wo a.

⁷ O re anung re ónal mi uAnduromikus ku uYumiyus. Oza_va ká i yà ka_nzhi ikan nzəng ka_oza. Ka_ashe onəm oga nre aKəristi te, oza_onəm va nvan kat. Oza_na nnandər na ku uKəristi mpyal mi.

⁸ O re anung re úAmipiliyus. Uza_va m man na man ka_ashe adin aPonzhi-Yesu.

⁹ O re anung re Úrbanu ka. Uza_va unəm uga nnəm inok aKəristi nzəng ka_yi. O re anung re úSetakis ukpa mi umanman.

¹⁰ O re anung re úApulis. Uza va uKeristi man ka na man a. O re anung re úArustobulus ka onem oga ashe nzhizhi.

¹¹ O re anung re unal mi uHirudiyan. O re anung re úNarsisas ka onem oga ashe nzhizhi va oja aPonzhi-Yesu a.

¹² O re anung re úTirifina ku uTirifosa ochar va ka nnem inok aPonzhi-Yesu ka igwak pa izen. O re anung re úParsis ukpa mi umanman. Uchar va nem inok aPonzhi-Yesu byet kpa ka igwak pa izen.

¹³ O re anung re úRufas. Unem aPonzhi-Yesu va nvan kat. O re anung unenan ka kpa. Uchar va yar mi wa ayen wo na kpa a.

¹⁴ O re anung re úAsinkirtus, ku uFilegon, ku uHamis, ku uPaturabas, ku uHamis ka abo ogenan va nzeng ka oza.

¹⁵ O re anung re úFilologus kpa, ku uYuliya, ku uNiriyas, ku ugenang genang uchar, ku uOlimpas ka nkpektak abo onem Inan va nzeng ka oza.

¹⁶ O re anung owan wo ka ashe mman. Nkpektak ikilisiya aKeristi iga atak va ta ka nre awo kpa.

¹⁷ Ogenang, mmami ka nchal wo pa o nem dakdak ka onem oga mba ka nkap izar, ka onem oga nnak oro i lep ifan. Onem va ka nlun na oza a vyap ndyang nnenan va ma ka dyang awo a. Kan o dat ka apir onem va ta kat.

¹⁸ Onem va ta inok aPonzhi-Keristi oza ka nnenem kat. Nnap afu oza na chwat rwa oza. Ka atak nnap-nla nchangchan ngga asap-anung, ka nna ndeng onem na oza ka nlam onem oga amwang.

¹⁹ Mmawo te, onem pa kpektak fe nnap nkpak

nnap nnəm wo fe. Nna nak te, ìgwak chàng mi pa_gənggəng kākul wo. Ka_nna kpa te, n dom wo pa_iyām na kpaktak inənan te, o yà ka_ aghan aga nnyi iyām va_ ta. Iyām va_ ibángbàng jiwo te, kan iyām ro a gwang wo ka_ kat.

²⁰ UPonzhi-Yesu uga mba ka_ ntəm-ikankan dat chit ka_ nnəm úShetan ka_ nchang kat, i nak wo o nəm ichumchum ka_ apal ishishi. Nnap-nnənan aPonzhi yi uYesu Kəristi a təm nzəng ká wo.

²¹ UTimoti unəm uga nnəm inok nzəng ka_ mi ka_ nre anung awo. ULusiyus, ka_ uYason, ká uSosipa onal mi ka_ nre anung awo kpa.

²² Mmami uTertiyus va_ n lir iyām va_ ta te, mmami ka_ nre anung ajem awo kpa ka_ ashe adin aPonzhi-Yesu.

²³ UGayus va_ nzhizhi sat atak va_ mi ra ka_ ka_ atak mbut ikilisiya ká ishi wò te, uza ka_ nre anung awo. UIrastus unəm uga nnakshi ka_ mbwai itong va_ ta ku ugənanng yi uKwartus ka_ nre anung awo.

²⁴ Re nnap nnənan aPonzhi yi uYesu Kəristi a təm nzəng ká wo pa_ kpaktak. Nna a təm.

Nwachi nnap-nlà ka_ nna adəngchi

²⁵ Re uza va_ uwa ká ichumchum iga nnak wo pa_ o kam ka_ ashe nnap-nlà Inan ngga nchang nfe va_ ka_ o fe ka_ atak mi te, ma na ichumchum á na. Wa nva ka_ n là awo nva ka_ n là nnap-nlà aYesu kəristi awo a. Nnap nlà va_ ta nva ka_ yà mbwambwam ka_ nnəm apambin na byet.

²⁶ N-yanmata te, a fa chit ka_ mban. Ma nak ma nyi ka_ atak iyām va_ onəm oga *nkam nre ka_ atak Inan ka_ lir wa nva Inan là ózà pa_ oza_ a lir. Inan

va tēm chit mbyet mbyet jiwo. Ma nyám nnap-mbwambwam vā ta kǎ mban na onēm oga nza akum ijili nggo te, oza a na nnandər kǎ na nzəng kǎ nkpak nnap nnəm á na kpa.

²⁷ Ichumchum tēm iji Inan chit mbyet mbyet. Uwa ji kǎ aghan pa kpaktak. Ma na ichumchum á na kǎ ashe adín aYēsu kərísti. Nna a tēm.

Tarok Bible

The Holy Bible in the Tarok language of Nigeria

copyright © 2024 Luke Initiative for Scripture Translation

Language: (Tarok)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 19 Dec 2025 from source files dated 10 Jul 2025

501af3c5-12fd-5965-ade7-9600b2d02717